

ASO FARAILE, 21 IUNI 2013

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ia, e tumau pea le alofa ma le agalelei o le tatou Tapaau Sili i le lagi. Ou te manatu o lea u avalo manu o le taeao, sa valo foi manu o pouli a o feagai pea le tatou Maota i le poa napo ma le tatou galuega. E le mafai ai ona faaitiiti le agaga vivii ae ma le faafetai i le Atua i mea uma, aua pe alu lenei aso o tatou lauvivilu ma tatou faafetai, o le alofa o le Atua e le mafai ona faatusatusalia. O lea e momoli atu ai le faafetai tele i le paia maualuga o le tatou Maota i lenei taeao fou na liugalua, o lo outou alafai mai i faguga lelei aemaise lo outou sagisagi mai i le amataina o le tatou Fonotaga i le faaiuga o lenei vaiaso. E momoli atu ai le faafetai tele i le paia ma le mamalu o le tatou Maota, i sa ma faiga ma paia ma mamalu sauoo, malo le onosai, faafetai le tauatai. Ua manatu ua tepa i ula tago i ula, ua le taua fua foi le pua nai Aganoa i le manogi ma le sasala o lenei taeao, o le sau o le ola. E momoli atu ai le faafetai tele i lau Afioga i le Palemia ma lau Kapeneta mamalu, aemaise le paia maualuga i lea talaga atoa i le afifio o le Afioga i le Taitai o le Itu Agai ma le Sui Taitai o le Itu Agai, ma le paia maualuga i a outou afioga i sui usufono.

E faamalo atu i le poa napo, e manatu ua tatou taunuu i le taunuuga ua pasi aloaia le tatou Tala o le Tupe, ina ia mafai ona laa i le sitepu muamua le faagaoioiga o galuega a le tatou Malo i lenei aso. E momoli atu foi le agaga faafetai tele i le aufaigaluega i tupu ma ee i Ofisa Sili ma Pulega Sili o Matagaluega ma Faalapotopotoga a le Malo, e talitonu o le tatou avega e tausoa.

O lenei aso, e le mafai foi ona faagaloina le tapuaiga a si o tatou atunuu o Samoa, malo le tapuai mai, faafetai lo outou onosai i le paia i Aiga ma a latou Tama, o Tama ma Aiga, Tumua ma Pule ma le loaloa ma le lasilasi o le paia o Samoa i ona tulaga faalupelupe, aemaise le tapuaiga i le paia i Faafeagaiga Taulagi i so o se fatafaitaulaga o lo o outou sui le ula ma lafo i tauau o le Atua e faamanuina lona alofa.

I lenei taeao, e manatu ona o nisi o faaopoopoga o le tatou Galuega, e tataua lava ona faatea ona o nisi o Tulafono taua ma nisi o galuega e faaauuina, ua manatu ai le Fofoga Fetalai, e lelei ona faasolo ona faagaoioi ai lea o nisi Tulafono taua e tataua ona faataunuu i aao o Matagaluega ma Minisita e faaauu ai le tatou Galuega.

ISI FAASILASILAGA A LE FOFOGA FETALAI

FOFOGA FETALAI: O le aso ua tuuina atu ai mo le silafia e Au Faasalalau le Faaiuga a le Fofoga Fetalai na faia i le Aso Lulu, 19 Iuni 2013 – e uiga i le taofia o le faasalalauina o nisi faamatalaga e ese mai i Faamaumauga Aloaia a le Palemene o taualumaga o felafolafoaiga – ona ua maitauina e le Nofoa nisi o saunoaga a sui usufono mamalu o lo o lipotia e le Au Faasalalau, peitai e le o faamauina i faamaumauga aloaia a le Palemene.

Ua taoto aulape o le le usitaia o lenei Faaiuga a le Nofoa e tusa ai ma aiaiga o le Tulafono o Pule ma Tulaga Aloaia o le Fono Aoaio Faitulafono 1960 – ma afai lava e le usitaia e le toe faatagaina loa i totonu o lenei Maota e auai ma faafofoga i taualumaga o felafolafoaiga a le Fono Aoaio.

Ae ou te fautuaina foi le mamalu o sui usufono e taofiofi le talanoa a o saunoa se sui usufono, aua o nisi o nei tuumumusuga o lo o lagona mai e le Au Faasalalau ma faapea ai ona faalauaitele atu i le mamalu o le atunuu, ae le o ni vaega aloaia o felafolafoaiga a le Fono Aoaio, e le faamauina foi i faamaumauga aloaia a le Palemene. O le itu sili ona ogaoga, o le lipoti atu i le atunuu lautele ae le o silafia e le sui usufono o lo o faasaga i ai nei tuumumusuga, e mafai ai ona tali atu aemaise i ni tuuaiga ma ni lafoga e le tusa ai ma le taualoa o lenei Maota e tatau foi ona fai i ai se faaiuga a le Fofoga Fetalai.

O le mea lea, se i silasila ane i ai sui usufono mamalu aua o le solifono foi lea, o le talanoa a o saunoa se isi sui usufono, ma faaalua ai le le faaaloalo i lea sui usufono.

O le faaaliga lea ma le faamoemoe o le a utagia lelei mai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, o se mea e fia malamalama ai.

FOFOGA FETALAI: Se i tulai mai le Taitai o le Itu Agai.

Afioga Hon Palusalua Faapo II: E le faatautee i le saunoaga mamalu a lau Afioga, aemaise lava le tulaga i le au tusitala ma le au faasalalau a le atunuu. O lea foi ua e saunoa i le tausiga o le mamalu o saunoaga ma felafolafoaiga i totonu o le Maota, ae pei e foliga mai lau Afioga i le Fofoga Fetalai o le a taofiofi ai le aia tatau a Afioga i sui usufono mamalu o le Palemene aua lava le faatinoina o latou tiute ina ia faasalalau ma ia silafia e le atunuu.

O le ala o lou tulai, o lo o i ai lava aulape a le tatou Maota nei pe afai ua laa se leo pe soli se Tulafono a le Palemene e ala i ana faasalalau. O le mea lea lau Afioga i le Fofoga Fetalai ua ou tulai atu ai, ina ia faamanino le tulaga lea, aua o lea lava e puipuia i lalo o le Tulafono Tumau le tulaga lea pe afai e i ai se faasalalau a se sui usufono ua solia le laina i le mea e tatau ona i ai e tusa ai ma le tausiga o le Palemene, aemaise la o le tiute ma le matafaioi a le au faasalalau i nusipepa, televise ma leitio, e pei o lea o le a saisaitia i i e tusa ai ma lau Tulafono ma le saunoaga a lau Afioga. O le ala lea o lou tulai atu ma le faaaloalo lava lau Afioga i le Fofoga Fetalai.

FOFOGA FETALAI: O lea ua ou maua le finagalo o lau Afioga i le Taitai o le Itu Agai, se i tuu atu le avanoa i le Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, pe maua sou avanoa faamolemole?

Faafetai i lau Afioga i le Fofoga Fetalai vaeatu le ee o le Maota. O tulaga faalupe foi o lenei taeao, ua e momoli lapalapa o malo ma faatagisia le alofa o le Atua i lona Agaga Paia e toia ai le mamalu o le Maota lenei aua ana felafolafoaiga ma galuega fai e tusa ona tofia ai lo outou mamalu, aemaise le paia o sui usufono mamalu o le Palemene, vaeatu le faafofoga a Samoa. Ua ou tulai atu ona faatoa tupu lava lea o se mea faapea. E ese le matautia o le mea lea pe afai e te faatagaina. O le faaiuga a le Fofoga Fetalai e tutoatasi e le mafai ona fesiligia e se tasi. O le mea la lea, o le Maota lenei o lo o i ou aao lava le faatinoga o ona taulumaga. O le puipuiga foi lau Afioga, o le mea lea a lau Afioga i le Fofoga Fetalai. Na ona ou faamanatu atu, ou te talitonu ua e sauni e tali le finagalo, a o se mea muamua lenei faatoa tupu o le fesiligia o le faaiuga faitoatasi a lau Afioga i le Fofoga Fetalai. Ma lou faaloalo.

FOFOGA FETALAI: Malo faafetai le tali mai i lau Afioga i le Minisita.

Afioga Hon Palusalue Faapo II: Lau Afioga i le Fofoga Fetalai, o se mea e fia faasao. A lea na matou fesiligia lau faaiuga lea na matou avea i le Faamasinoga. O le ala foi lea o le tatalo atu, ona o le aia tatau a le au tusitala ma i tatou.

FOFOGA FETALAI: Malie le Taitai o le Itu Agai. Alaala i lalo le sui usufono mamalu. Le Taitai o le Itu Agai malie maia. Ua e silasila oe i le tulai mai o le Minisita mo Tina ma Tamaitai, Atinae o Nuu ma Afioga ma Agafesootai? A le aia tatau lea na ou tuu atu ai le avanoa ia te oe e te saunoa mai? Ou te le faatagaina, ae leaga e faigata e tatau ona ou tuuina atu le avanoa.

Se i ou faamalamalama atu la le mafuaaga na ala ai ona fai le mea lenei. O totonu o le Maota lea e avatu ai le faaiuga lea a le Fofoga Fetalai, leaga e le mafai ona soona omai lau uma faamatalaga e le o i totonu o Faamaumauga aloaia a le Palemene. O a uma Faamaumauga o i totonu o a tatou Hansard ma mea ia, o mea ia o lea e fai i ai le tautalaga i le taeao lenei. O fafo atu, pule outou o le mea lena a outou, faitalia outou ma le lapisi lea tou te faia i fafo atu o le Maota ma fafo atu o le lotoa lenei. A o totonu la iinei, e le mafai la ona ou tuuaunoa le mea lena. E le avea le talanoa i lau text ma lau telefoni ae faamaumau i lalo i le Hansard, e leai.

O le agaga lena lau Afioga i le Taitai o le Itu agai, o lea ua saunoa malamalama le Afioga i le Minisita mo Tina ma Tamaitai, Atinae o Nuu ma Afioga ma Agafesootai. E faamalulu atu i la outou Afioga ne i outou maitau mai o nisi o tulaga, ae silasila foi ananafi, o lea lava e olo le fua i le Nofoa ma avatu vaimalu ona o lo tatou nonofo, a e le mafai. O lea ua ou faataatia le aulape lenei pe tua ma ni a mo le lumanai, e le mafai ona tuuaunoaina le mea lenei. O lea sa outou silasila i ai i le aso ananafi. E le o ni upu aloaia nei sa lafo i totonu o le Maota lenei. O lea ua ou faamalamalama atu mo le silafia e lau Afioga i le Taitai o le Itu Agai ina ia tausisia le mea lea, ma ua tatau ona fai le faaiuga aloaia a le Fofoga Fetalai, o le ala lea o le tuuina mai aloaia o le mataupu lenei.

Ou te tapa le sui usufono mo Gagaemauga Nu.2, ua outou silafia le mataupu na tuuina mai i le aso ananafi, ona o nisi o mataupu sa tulai mai i le atagia ai o le fesiligia o le faamaoni a nisi o Faauluuluga o Matagaluega a le Malo, le Matagaluega o Tupe Maua na faatuina ai le lafo aloaia a le Palemene i le aso ananafi i le tausisia o tatou Tulafono Tumau ina ia tuuina mai le faamaoniga o faamatalaga. Ma e talitonu le Nofoa e le mama mataupu faapenei leaga e tautalagia ai le amiotonu ma le fesiligia. Peitai ane e le mafai e i latou na tuuaia pe tautalagia ona tali mai i le Maota. Sa faatuina ai le tatou lafo i le aso ananafi ina ia tuuina mai faamaumauga i totonu o le tatou Maota mo le faamaoniga o folasaga a sui usufono mamalu na taua. O lea ou te tapa ai le sui usufono mo Gagaemauga Nu.2 ina ia tuuina mai le faamaoniga e tusa ma le lafo ananafi.

Na faataatia e le sui usufono mo Gagaemauga Nu.2 Pepa o faamaoniga o ana saunoaga e tusa ai ma le Lafo na faatuina i le Aso Tofi, 20 Iuni 2013.

FOFOGA FETALAI: Faafetai. Ou te manatu e le o toe po malae i le tulaga na taoto i ai le lafo e uiga i le mataupu lenei, na tuuaia ai e le sui usufono mo Gagaemauga Nu.2 le le faamaoni o le aufaigaluega ma le Matagaluega o Tupe Maua i le aoina o tupe, na mafua ai ona faatuina le lafo.

E tusa ai ma Tulafono Tumau 82(6) mo le sui usufono mo Gagaemauga Nu.2 e tuuina mai ni faamatalaga e faamaonia ai ana tuuaiga.

E ao lava ina silafia e lenei Maota ma Samoa o lo o faafofoga tapuai mai, e le mama i le Nofoa le tuuaiga ona o lenei:

1. O le tuuaiga o lo o tau faalauaitete ai le aufaigaluega a le Matagaluega o Tupe Maua, o lona uiga e amata mai lava i le Ofisa Sili o Pulega e oo atu lava i sē aupito itiiti o le aufaigaluega; peitai e le mafai ona tali mai le aufaigaluega ua taua faalauaitete i totonu o le Palemene i nei tuuaiga.
2. E tatau ai i le Nofoa ona tausolomua i le puipuia o aia tatau a tagata e le o mafai ona tali mai i tuuaiga a sui usufono aemaise lava o le aufaigaluega galulue o lo o vae ma lima i ai le Malo.

O lea foi ua silasila le Maota i le taeao nei, o lea ua faaoo mai e le sui usufono ni faamaumauga e lagolago ai ana tuuaiga na faia ananafi. O le sao ma le atoatoa o faamaumauga ua tuuina mai, o le isi lena itu taua e tatau ona silasila totoa i ai. Ae ua ou vaai atu, e fai sina mafiafia o pepa ua tuuina mai, o lona uiga a sagai atu le Fono Aoaio e iloilo e iu ina tatou fai tapuaiga iinei i le Sapati, ae ua ou taofi – e tatau ona maua se avanoa e oo mai ai le Aufaigaluega a le Matagaluega o Tupe Maua e tali i tuuaiga.

Ia sei tulai mai lau Afioga i le Minisita mo Tupe Maua.

Tofa Hon Tuiloma Lameko (Minisita mo Tupe Maua): Lau Afioga i le Fofoga Fetalai, ua ou tulai atu ma le faaaloalo i lau Afioga ua maitauina o lea ua sao lou finagalo, o le tuuina mai o nei pepa ma mea uma nei, e leai se isi e faamaonia nei mea, vagana la o lea ua aumai le finagalo o lau Afioga mo le sailiiliina aloaia, o lea ou te tu atu ai e lagolagoina le vaega lena lau Afioga ma le mamalu o le Fono.

FOFOGA FETALAI: Ia sei tulai mai le sui usufono mamalu.

Tofa Levaopolo Talatonu (Gagaemauga Nu.2): Lau Afioga i le Fofoga Fetalai, e na o sina faaopoopoga laitiiti lava lea i lau Afioga mo lea mataupu.

O le agaga autu lava na avatu ai se lagona ananafi, ia o le tuutuu atu o o matou tauau e tausoa le....

FOFOGA FETALAI: O lea ua maua le taumafai mai o le sui usufono mamalu, o le a faauma atu le faasilasilaga a le Fofoga Fetalai ona avatu lea o le tulaga lena.

Tofa Levaopolo Talatonu: Faafetai.

FOFOGA FETALAI: Ona manatu ai lea o le Nofoa, e lelei le faatulai o se tatou Komiti Suesue Faapitoa, e faasee i ai faamaumauga nei latou te iloiloina pe faamaonia ai tuuaiga a le Sui Usufono o Gagaemauga Nu.2, ona avanoa ai lea o le Aufaigaluega o lo o tuuaiga e tali i tuuaiga, ae maua ai foi le avanoa o le Sui Usufono e faamalamalama atili ai lana mau.

I lea tulaga, ou te faailoa atu ai le Komiti Suesue Faapitoa ua filifilia mo lenei galuega, faapea ma Taiala o Iloiloga a le Komiti:

SUI AUAI:

1. Tofa LAUTAFI Fio Selafi Purcell – *Taitaifono*
2. Tofa LEFAU Harry Schuster – *Sui Taitaifono*
3. Afioga TIALAVEA Fea Tionisio Seigafolava – *Sui Usufono*
4. Afioga AFUALO Wood Uti Salele – *Sui Usufono*
5. Afioga TAEFU Lemi – *Sui Usufono*
6. Susuga PAPALII Lio Faavaivaiomanu Taeu Masipau – *Sui Usufono*
7. Tofa TUISA Tasi Patea – *Sui Usufono*
8. Fepuleai Letufuga Attila Manutoipule Ropati – *Failautusi o le Komiti.*

TAIALA O ILOILOGA O GALUEGA A LE KOMITI:

Ia silasila le Komiti i tulaga nei ma toe lipoti mai i le Fono Aoao i le isi fonotaga e sosoo nei i le aso 6 Aokuso 2013:

1. Pe faamaonia e le Komiti o Pepa ua faataatia nei i luma o le Laulau a Fono e le Sui Usufono o Gagaemauga Nu.2 (Tofa LEVAOPOLO Talatonu) e faamaonia ai: “..e le o faamaoni le aufaigaluega a le Matagaluega o Tupe Maua i le aoina o tupe.”
2. Fautuaga e limataitaiina ai le faatautaia e le Fono Aoao o mataupu faapenei e tuuaiga ai tagatanuu aemaise o le Aufaigaluega a le Malo, e ni Sui Usufono.
3. Fautuaga e fua i ai se faaiuga a le Fono Aoao i le Sui Usufono pe afai e le mafai e faamaumauga ua tuuina mai e le Sui Usufono ona faamaonia ana tuuaiga.

O lenei fuafuaga ua faia i lalo o le Tulafono Tumau 90:

“O le a i le Fofoga Fetalai i le tausiga ma le faamamaluina o le nofo filemu i totonu o le Fono Aoao faapea foi tulafono e puipui ai le fefaaaliaiga o taofi, ma o lana faaiuga o le a le faaavanoaina e fai i ai se talosaga ma o le a le toe iloiloina e le Fono Aoao....”

O lea ou te faailoa atu ai i le Fono Aoa:

1. Ua faagasolo le iloiloa o Tuuaiga a le Sui Usufono o Gagaemauga Nu.2 i le aso ananafi 20 o Iuni faasaga i le Auaigaluega a le Matagaluega o Tupe Maua, ma Faamaumauga ua tuuina mai e le Sui Usufono Nu.2 i le taeao nei, aso 21 o Iuni e faamaonia ai ana Tuuaiga;
2. Ua faasee atu ai lenei mataupu mo iloiloga a le Komiti Suesue Faapitoa mo ana suesuega ma iloiloga ma toe lipoti mai i le Fono Aoa i le aso 6 Aokuso 2013 e tusa o Taiala o Iloiloga o Galuega a le Komiti ua tolaulauina.

Ma i le maea ai ona tagofia e le Fono Aoa Faitulafono o le Lipoti a le Komiti Suesue Faapitoa, e faataapeina ai ma le Komiti Suesue Faapitoa.

O faamanuiaga tau alauni o le Komiti e mulimulitaia lava taiala ua faataatitia mo alauni o Fonotaga a Komiti Filifilia o le Palemene.

Ou te poloaiina ai Sui Usufono mamalu o lenei Maota, ina ia aua nei afea e ni saunoaga lenei mataupu seia talia ai le Lipoti a le Komiti Suesue Faapitoa.

Ia, ou te manatu o lea ua...ia sei tulai muamua mai lau Afioga i le Sui Palemia.

Tofa Hon Fonotae Nuafesili Pierre Laufo (Sui Palemia): Lau Afioga i le Fofoga Fetalai, leai o lea ua ou usitaia ia le faatonuga a lau Afioga pei ona tuuina mai i lenei mataupu. Ae ua ou tulai atu ma le agaga faaaloalo, o au foi ou te le o malamalama tele i le mataupu e pau lava o lea, o lea ua taoto i le Maota ia lou finagalo Komisi Suesue Sui o Komiti faapea foi le tulaga o le galuega o le a alo atu e faatino, a o le vaega lea e tau i ai sina popolega o le taofi o lou sui usufono ona o lea e le o po se lilo, o lea e loma le faamasinoga o le sui usufono mamalu i luma o le Faamasinoga. E i ai lau maitau ma lau faalogo o mataupu lava ia, o le mea la lea ou te popole ai nei faaoga le Maota Fono e fau ai se tetee e tuuina atu i luma o le Faamasinoga o le mataupu lenei, o le mataupu lea o lea ou te tilotilo atu e tau popole ai le taofi e pei o le vaega lea. Ae silasila foi, o lea ua taoto i luma o le Faamasinoga moliaga, o lea foi ua faailoa le tetee o le sui usufono i luma o le Faamasinoga, a o lea ua tuuina mai le mataupu lea i luma iinei, o mataupu tau i le Ofisa o Tiute, ma atonu ou te le toe tautala e faamatala le tuuaiga e faasaga i le sui usufono mamalu o lea ua nofofale ia Satuiamaa tulaga uma. Na ona faailoa atu le atugaluga o lo o nofo ma au lau Afioga i le Fofoga Fetalai, ia o lena e iina le tofa ma le faautaga. Ia ou te manatu foi, pe a se finagalo pe a tusa ai, na o se fautuaga po o se tuualalo, po o le a se finagalo ae tapa se fautuaga mai le Loia sili e tusa ai ma lenei mataupu, nei tulai mai se feteenaiga i le tulaga o tiute o le Palemene e faapea foi le galuega o lo o faatino e le la foi Lala Tumaoti o le Tafatolu o le tatou Faigamalo, o le Ofisa o Faamasinoga.

Na o se tuualalo e faapena atu lau Afioga i le Fofoga Fetalai, ona o lo o faafofoga le atunuu ia faapea tei ua faitau ma maitau mai, ia ai o tatou e le o silafia tulaga ia o lo o faagaioi, ma lou faaaloalo lau Afioga.

FOFOGA FETALAI: Malo, faafetai saunoa i lau Afioga i le Sui Palemia.

Tofa Lefau Harry Schuster (Vaimauga Sisifo): Lau Afioga i le Fofoga Fetalai....

FOFOGA FETALAI: Ia sei ou tali muamua i i, malie le sui usufono o lo o saunoa sei fai atu muamua le faamalamalama lea a le Fofoga Fetalai.

O lea ua maua e le Nofoa le saunoaga a lau Afioga i le Sui Palemia, e pei lava ona manino i le aso ananafi le faasilasilaga ma le faatulai mai o lenei lafo, i lalo o le Tulafono Tumau 82(6), e tapa ai e le Fofoga Fetalai lea sa outou faafofoga i le saunoaga a le sui usufono mamalu e tuuaia ai le lē faamaoni o le Matagaluega i le aoina o tupe, na pau lava lea o le vala lea na tulituliloa ananafi. O lo o atagia ai lona tuuaiga matuia o le aufaigaluega ma le afioga i le Tamaitai Pule i le tulaga lea, ua maua le tulaga ua saunoa i ai lau Afioga i le Sui Palemia ma e le laaloa le faatonuga lea a le Fofoga Fetalai ua tuuina atu, o nisi lavelave ma felefele o lo o i ai le atugaluga lau Susuga i le Sui Palemia, ia ou te manatu e tapu le tulaga lena i le vatapuia aua le Faamasinoga lea e te saunoa i ai. Na pau lava le vala ananafi na mafua ai ona talia e le Fofoga Fetalai, ia ua le faa-tasi le faalua le saunoa soo o le sui usufono mamalu lea o le tuuaia o le lē faamaoni o le Ofisa o Tiute i le aoina o lafoga, o se tuuaiga e le mafai ona tali mai pe faamaonia ia tulaga. O lona uiga e tele le aafiaga o le tamaliiaga ma le tauleleia o le Matagaluega, silasila i le \$500 ma ona tupu miliona, ia a o lenei o le a faatasina i ala le faapea mai, e le o aoina uma tupe a le Matagaluega. O le ala lea na tapa ai ananafi ma faamaonia e le Maota, ina ia tuuina mai faamaumauga, a o le tulaga i le Faamasinoga pei ona taua e lau Afioga i le Sui Palemia, e talitonu o lo o tapuvaia e le mafai ona sopoloa se faaiuga a le Palemene agai i Tualumaga o lea e alo i ai le Faamasinoga.

O le faasilasilaga lea a faapea foi o tulaga ia, ia e aafia foi ma le tulaga aua o le Faamasino Sili ia na te fautuaina le Fofoga Fetalai i le tulaga o le faasologa o le mataupu lenei, ae o le a aofia faatasi ma le fautuaga a lau Afioga i le Sui Palemia, ia o taimi o iloiloga, ou te manatu e taunuu ai i le taunuuga lelei e ala i le fautuaga ua tuuina mai.

Tofa Lefau Harry Schuster: Lau Afioga i le Fofoga Fetalai....

FOFOGA FETALAI: Ia sei tulai mai se tasi o sui usufono mo Vaimauga Sisifo, Tofa Lefau Harry Schuster.

Tofa Lefau Harry Schuster: Lau Afioga i le Fofoga Fetalai faafetai tele lava mo le avanoa, ou te faafetai tele lava lau Afioga i le Fofoga Fetalai ma le mamalu o le Maota i le faatuatuaga i le filifilia foi o au e avea ma se tasi o ē e suesueina lenei mataupu, e le itiiti ia te au le faatuatuaga, e le o se tulaga foi la faapea ou te fefe pe ou te le fia faia le galuega, ou te le augata, ae e ao ona ou faailoa le tulaga lea lau Afioga, ua uma ona fai le tatou tautoga i luma o le Palemene, ia faia le mea moni, o au foi na fai lau tautoga i luma o le Faamasino Sili i tulaga faa-Loia e tausisi lava i le Tulafono i taimi uma ma tausi le mea moni o le Tulafono. Ae ao ona ou faailoa atu faapea lau Afioga, ona o le tulaga foi tau Faamasinoga e le gata i le atagia o le faia o le mea moni, ae ia faia ai o le mea moni. O le mea la ou te popole i ai, o Pitola Lusua o lou tei o lou aiga mai Samusu ma Amaile, o le tulaga lea e ao ona ou faailoa i lau Afioga, e le itiiti le suesuega lea ae po o fea le mea e agai i ai, e i

ai lava ona aafiaga pei ona ou fai atu ou te le fefe ou te le palaai ai foi i le suesuega, ae o le fua la pe talafeagai lou i ai i le Panel lea ae o lea e i ai le tulaga, e le gata o le faia o le mea moni ae ia atagia le faia o le mea moni. O se faasilasilaga lea lau Afioga po o le a se tofa, a faapea o le faatonuina o le Palemene ou te alu e fai le galuega lea, ou te le palaai ai, ae e faataatia i luma o lau Afioga le tulaga lea, pe talafeagai lou i ai a o le piitaga o maua ma Pitolau o maua e aiga i Amaile ma Samusu lau Afioga.

FOFOGA FETALAI: Ia e faafetai atu i le saunoaga mamalu a lau Afioga i le sui usufono mamalu, ia e i ai le talitonuga o le Nofoa, e leai lava se tasi e alo i le Tulafono, ou te manatu foi e le mafai ona tatou faaaogaina o tatou sootaga faale-tagata e mafai ai ona ufiufia o tatou tofiga faa-Taitai o le atunuu. O le agaga ma le faamoemoega ma le faatuatuaga ua tuuina atu e le Nofoa, ia ou te talitonu ia faia le amiotonu pei ona fesiligia i le aso ananafi, na mafua ai foi ona faatuina le lafo. O lea o le mafuaaga tonu lena i lau tofa se tasi o sui usufono mo Vaimauga Sisifo, Tofa Lefau Harry Schuster na mafua ai ona tofia lau Afioga e avea ma se tasi o le Komiti lenei, ma e talitonu o le a le afaina lea i lou lea lagona. Ae malie mai o lea ua ou tofia aloaia lau Afioga, ia tou te sagai ane ai o le tai tou te iloilo le mataupu lenei ia ona toe lipoti mai lea i se faaiuga a le Maota, aua o le faaiuga o la outou fautuaga ma la outou lipoti, ia e le fai toatasia, o le faaiuga ma le tonu mauu, e fai e le Maota Fono lenei. Ae le mafai ona tatou lauiliuina le lipoti lenei, ia o lona uiga e tau i le vaiaso fou e muliga le Tala o le Tupe i le mea lea, ae tatau ona iloilo lelei i ona tulaga atoatoa ma le aloaia ma le maioio, ia ona toe tuuina mai lea o la outou lipoti, ina ia faamaonia ma faia i ai se faaiuga a le Maota lenei. O le faaaliga lea ma le faaaloalo, i se tasi o sui usufono mo Vaimauga Sisifo, Tofa Lefau Harry Schuster.

Tofa Lefau Harry Schuster: Ia faafetai tele lau Afioga o le a tuu lou loto ae fai lou finagalo.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai ma le faaaloalo lava.

FOFOGA FETALAI: Tulai mai le sui usufono mamalu.

Afioga Hon Aeau Peniamina Leavaiseeta: Lau Afioga i le Fofoga Fetalai ma le faaaloalo lava, ou te tulai i le agaga faaalo i le ava e tatau i le toafimalie o lenei taeao totoa i le alofa ma le agagalelei o le tatou Matai i le Lagi. Ua maea foi la ona momoli laau i Fogaa i le taimi ua fano.

Lau Afioga i le Fofoga Fetalai, ua ou tulai atu ma le agaga faaaloalo ona o au e ana le lafo lea. O lenei lafo atonu e fesiligia e le Itu le la aua sa le tatau ona faia le lafo a le Itu lenei. Na ona faamalamalama faapea i lau Afioga i le Fofoga Fetalai, i le Vaega Faaupufai lenei ma faavaae o le matou mafutaga, sa matou tuutuuloloto i matou galuega fai. O sou sao Pati lenei, leai, e le afaina, e tatau foi ona i ai se Pati a le vaega lea e faaopeaopea e le afaina e omai e matamata. Lau Afioga i le Fofoga Fetalai, ona oo mai lea i le mataupu lea.....

FOFOGA FETATALI: Ou te faamalulu atu i lau Afioga i le sui usufono mo Falealupo, malie sei fai atu lava lau tala lea. O le faasilasilaga lea, na ala ona ou tuuina atu ona o lau Afioga na faatuina le lafo ae leai se faafinauga po o se talanoaga o le mataupu lenei. O lea ua iu le mataupu o le lafo na faatuina la e manino le atunu, o le lafo na faatuina e lau Afioga ma ua faaluaina e le Palemene ma ua tuuina mai faamaumauga e pei ona tapa i le aso ananafi ma ua iu ai la i i le mataupu. E le talanoaina lea ua manino ma malamalama le folasaga i lenei taeao ma ua tataua ona faasolo foi le tatou galuega. O lea ou te faamalulu atu ai.

Afioga Hon Aeau Peniamina Leavaiseeta: O le foi se manatu ae pau lava o lea lau Afioga i le Fofoga Fetalai o lau fesoasoani i le lafo e faapea, lau Afioga ua i ai lau saunoaga....o le tulaga lea....o le faalavelave o lea o le a sau le malamalama.....

FOFOGA FETALAI: Malie le sui usufono mo Falealupo o lea ua ou malamalama atu.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai o lea ua taoto lau faaiuga ma e tataua loa ona tatou aloaia le faaiuga. O a foi mea e tulai mai i le faaiuga lenei o le lalolagi lenei tatou te i ai, o le lalolagi o aoaoga e tele lava mea e tutupu mai i manatu fou ona o isi mea e tutupu. E tele foi ina tatou iloa ni faaiuga sao po o le faaletonu ina ua tuanai mea e tutupu. Ua ala ona ou tulai atu ona o le tulai mai o le sui usufono na faatuina le lafo e taumafai e aumai ni upu faaoloataua. Sei vaai i ai na o le fa sekone ae tolu faaoloataua ia na aumai i le taeao nei. Tuu ia le Fofoga Fetalai ua uma ona fai lana faaiuga ae tatou alofaiva e i ai isi mea ia e mulimuli mai.

FOFOGA FETALAI: Malie le sui usufono mo Falealupo a i ai ni ou alofa ia puipui le tou Itu.

O lea ua ou puipui atu i le tou Itu, ua talia lau lafo ua lava lea o le a tuai ona faagasolo le tatou galuega.

Afioga Hon Aeau Peniamina Leavaiseeta: O lou alofa ia na ou faatu ai le lafo ona o le puipui i le Maota lea. Ia ua lelei o le a ave i fafo lou manatu.

FOFOGA FETALAI: O lea ua tuuina mai faamaumauga ma ua out alia ma aloaia o le a alo le Komiti i le iloiloia.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se o ituaiga upu le mafaufau ia e fai mai e alu e ave i fafo ona manatu. Ia o ai oe? O ai oe e te nofo ai ma faafefe mai le Maota?

Afioga Hon Aeau Peniamina Leavaiseeta: E tutusa lelei lava au ma oe. O au o le sui usufono mo Falealupo, e le mafai la ona taofia e oe au. O ai la oe ia au?

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ua fai soo lava le faale mafaufau o le sui usufono lenei. Ua fai soo e a le soli fonofono? E te faavalevatea?

FOFOGA FETALAI: Malie lau Afioga i le sui usufono mo Falealupo. Ia malu ave i fale le finagalo o le Taitai o le Malo. O le ala lava lea o le maumau iu maea ma taumafai atu le Nofoa ina ia lauama tootoo le tatou fonofono i lenei teao. Ia malilie sui usufono mamalu o lea ua taatia le Faaiuga a le Fofoga Fetalai, ua alu le aso ananafi o ou taumafai atu pea ma faaoololomaau i tulaga faatupu ma tulaga faatamalii. Ia outou mau le toovae ma mau iu maea le mamalu ma le maualuga o le tatou fonofono. Ia tausisia tatou Tulafono Tumau ma ia tausisia pea le mamalu o le Palemene ae silisili ai le tatou vatapuia, le va nonofo ma le va faatamalii.

TULAFONO TAU FAAOFI O LE TEUTEUGA O LE FAAVAE 2012 – iloiloga auiliili

FOFOGA FETALAI: E tusa ai ma le Tulafono Tumau 106.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Sa ou fautuaina le Ofisa i tulaga o le Tulafono Tau Faaofi o le Teuteuga o le Faavae po o le a se finagalo ae toe faapafala i le Aso Gafua se i maua se avanoa e toe silasila ai i ai le mamalu o le Maota lenei, ona ua fai sina leva ona taoto atu i le Komiti, ona tatou alofaiva ai lea i le Aso Gafua i le auiliiliga. E le natia ona o le mataupu lenei o le Teuteuga o le Faavae e le gata ina ia lava le taimi i tua, ae se i lava foi se taimi e toe foi mai ai se i silasila totoa i ai le Maota aua o lea e i ai nei, taeao ma le Aso Sa, ona tatou omai lea i le Aso Gafua ona faagasolo ai lea o le tatou galuega i Teuteuga nei e lua o le Faavae.

FOFOGA FETALAI: O lea ua maua le finagalo o le Afioga i le Palemia.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai.....

FOFOGA FETALAI: Tulai mai le sui usufono mamalu mo Faleata Sisifo.

Tofa Lealailepule Rimoni Aiafi: E lagolagoina le finagalo o le Palemia ona o le mea nei ua leai ni Tulafono Tau Faaofi ua leva..... ona faapea ua pasia lea mea. O lea na tapena tatou kesi ma avatu ai ma Tulafono ao lea e fia faitau pe mafai ona toe tufa mai ni nai kopi sei faitau. O lea e faapea ua pasia lenei Tulafono Tau Faaofi ao le faatoa toe aumai. Ma le faaaloalo lava faafetai.

FOFOGA FETALAI: O le mafuaaga tonu lena lea ua ou vaai atu ua alu le taeao o saveu pepa i luga o lau kesi, taumafai ona tuuina atu tatou tulafono ma faitau ma faataatia lelei i luga ae aua le aveina i le fale. Aua o le mea lena e tupu, e le taitai malamalama....

Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, ou te iloa ana fai nei e pasi nei lava aua e leai ma se isi o matou o i ai se Tulafono Tau Faaofi. E pei ua sasi le Palemia i le mea lea.

FOFOGA FETALAI: Sei tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, a silasila mai iinei e tofu uma lava matou ma Tulafono Tau Faaofi ao le alofa atu ia te outou e leai ni tou Tulafono Tau Faaofi.

FOFOGA FETALAI: Malo faafetai. E manatu o lea ua maua e le Nofoa le saunoaga a le Palemia ma o le Tulafono Tau Faaofi lena e le mafai ona tago faatumutumulima i ai le Malo leaga o lo o aafia ai le suiga o le Faavae. E tatau ona atoatoa le tulaga o le tapenaga lelei ona o se tasi o Tulafono Tau Faaofi ua leva ona tuuina atu i le Komiti ae leaga o lea sa tatou pisi i le Tala o le Tupe ma le tele o isi mau galuega. O lona uiga e tatau ona tatou toe tilotilo lelei ina ia manino ma malamalama e le faigofie ona taliaina e le Maota le o le malamalama i le Tulafono Tau Faaofi o lo o aafia ai le Faavae o le atunuu. Ona ou manatu ai lea ua talia e le Fofoga Fetalai le tulai mai o le Afioga i le Palemia o le a faataatia le Tulafono Tau Faaofi lea sei tatou toe soalaupuleina i le vaiaso fou.

TULAFONO TAU FAAOFI O LE OFISA O LE LOIA SILI 2012 – iloiloga auiliili

FOFOGA FETALAI: E tusa ai ma Tulafono Tumau 106 e tatau ona faamaonia muamua e le Fono Aoa o le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai lau Afioga i le Taitaifono o le Komiti o Mataupu Tau Faamasinoga, Leoleo & Falepuipui ma Faamasinoga o Fanua & Suafa.

Afioga TUISA TASI PATEA (Taitaifono o le Komiti o Mataupu Tau Faamasinoga, Leoleo & Falepuipui ma Faamasinoga o Fanua & Suafa): Lau Afioga i le Fofoga Fetalai ou te faatu le lafo, *Ina ia faamaonia e lena Fono Aoa o le Lipoti a le Komiti o lo fautuaina ai ina ia faagasolo le Tulafono Tau Faaofi o le Ofisa o le Loia Sili 2012 faatasi ma Teuteuga ma Faasaoga.*

Faaluina e le sui usufono mo Alataua Sisifo, se tasi o sui usufono mo Vaimauga Sisifo, Tofa Lenatai Victor Tamapua, sui usufono mo Gagaiifomauga Nu.2 ma le sui usufono mo Palauli.

Na faamaonia le lafo.

FOFOGA FETALAI: O le a sagai atu loa le Fono Aoao i le iloiloga auiliili o le Tulafono Tau Faaofi o le Ofisa o le Loia Sili 2012. E tusa ai ma le Tulafono Tumau 102 e amata le iloiloga auiliili o le Tulafono Tau Faaofi i le Fuaiupu 2:

FUAIUPU 2: Faamatalaina o uiga o upu.

Faamaonia.

FUAIUPU 3: Faavaeina, tuufaatasiga ma le Minisita e fitoitonu i ai.

FOFOGA FETALAI: O lo o i ai le Teuteuga a le Komiti i le Fuaiupu 3 e pei ona faaalai i le Pepa Faaopoopo o Galuega Nu.3
Tulai mai lau Afioga i le Taitaifono o le Komiti.

Afioga TUISA TASI PATEA: Lau Afioga i le Fofoga Fetalai ou te faatu le Teuteuga o le Fuaiupu 3 e faapea:

“Teuteuga:

la soloia faaupuga “o le toatasi (1) po o le sili atu o Sui Loia Sili” e pei ona aliae mai i le parakalafa (b) Fuaiupu 3 ma suia i le faaupuga sao “faauluuluga o vaega o tulafono taitasi” ma faitauina ai le Fuaiupu 3(1)(b) fou e faapea:

“(b) faauluuluga o vaega o tulafono taitasi.””

Faamaonia le Teuteuga.

Na faamaonia le Fuaiupu 3 e pei ona Teuteuina.

FUAIUPU 4: Galuega tauave.

Faamaonia.

FUAIUPU 5: Vaega.

FOFOGA FETALAI: O lo o i ai le Teuteuga a le Komiti i le Fuaiupu 5 e pei ona faaalai i le Pepa Faaopoopo o Galuega. Nu.3

Tulai mai lau Afioga i le Taitaifono o le Komiti.

Afioga TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 5 e faapea:-

“Teuteuga:

Ia soloia faaupuga “Sui Loia Sili” o lo o i le faafuaiupu (5)(a) ma sua i le faaupuga sao “loia” ma faitauina ai le parakalafa (a) fou e faapea:-

“(5) E mafai e le Loia Sili ona:

- (a) **Tofia se loia e avea o faauluuluga ma vaavaaia taitasi le Vaega o Mataupu Tau le Va o Tagata, le Vaega o Moliaga Faaletulafono, ma le Vaega e Tusia Tulafono (e aofia ai so o se isi vaega faaletulafono ua faavaeina i lalo o le faafuaiupu (4) po o”**

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): Lau Afioga i le Fofoga Fetalai.....

FOFOGA FETALAI: O le a le Fuaiupu le sui usufono mo Aana Alofi Nu.3?

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai o le Fuaiupu 5.

FOFOGA FETALAI: Tulai mai le sui usufono mamalu mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faaefatai i lau Afioga mo le avanoa. O le faafesili e uiga i le Fuaiupu 5 ma le auiliiliga o le Lipoti a le Komiti ona sa faaalua nisi o manatu i le vaega lea o le tuueseeseina o Vaega e tolu aemaise lava o le Solicitor General ae o lo o maitauina e le o i ai se faamaumauga a le Komiti sa latou iloiloina lea vaega. O lea la e sau ai i totonu o le Tulafono o lea lava e i lalo o le Loia Sili. E talosaga atu i le Komiti pe na fai se latou iloiloga ona e le o faamauina mai lalo o le latou Lipoti. Faafetai.

FOFOGA FETALAI: Tulai mai lau Afioga i le Taitaifono o le Komiti.

Afioga TUISA TASI PATEA: Faafetai atu mo le faafesili. O le vaega lea o le Solicitor General e pei ona taua e le sui usufono mamalu sa fesiligia le Loia Sili, o le tali mai e le o aafia le tatou Tulafono Tau Faaofi lea i le vaega. O le tali puupuu atu lea.

Faamaonia le Teuteuga.

Faamaonia le Fuaiupu 5 e pei ona Teuteuina.

FUAIUPU 6: Galuega tauave a le Loia Sili.

FOFOGA FETALAI: O lo o i ai le Faasaoga a le Komiti i le Fuaiupu 6(7) e pei ona faaalua i le Pepa Faaopoopo o Galuega. Tulai mai lau Afioga i le Taitaifono o le Komiti.

Afioga TUISA TASI PATEA: Lau Afioga i le Fofoga Fetalai ou te faatu le Faasaoga i le Fuaiupu 6(7) e faapea:-

“Faasaoga:

Ia aveese le faaupuga “leai” ina ua tuanai upu “po o le a” ma suia i le faaupuga sao “i ai” ma faitauina ai le faafuaiupu 6(7)(a) fou e faapea:-

“(a) o lo o i ai po o le a i ai se aia feteenai i le faia o se galuega faaloia mo le ofisa sooupu; po o.””

Faamaonia le Faasaoga.

Faamaonia le Fuaiupu 6 e pei ona Faasaoina.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: O fesili i le vaega lea.....

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: O le Fuaiupu 6 lau Afioga i le Fofoga Fetalai.

FOFOGA FETALAI: Malie lau Afioga i le sui usufono ua uma ona tali mai, ua uma foi ona tuuina atu le Fesili ma ua tautuauega lou tulai mai.

FUAIUPU 7: Tutoatasi.

Faamaonia.

FUAIUPU 8: Faatonuga ma le faamatuuina atu.

Tofa LEALAILEPULE RIMONI AIAFI: Lau Afioga i le Fofoga Fetalai leaga e te lei lagoina mai ao lea la o le la ua ou tulai atu i le Fuaiupu 8 faamolemole.

FOFOGA FETALAI: Tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: O le mea lea sei tagai i ai o le galulue vavalalata o le Ofisa o le Loia Sili ma le Komisi o Galuega a le Malo aemaise i le faasoaina o alii ma tamaitai loia fou ia e faatoa taunuu mai. Ia lava ni avanoa faigaluega e faigaluega ai latou faatoa omai aua o le avanoa e tuusaoloto. Ao le mea lea e fia fesili atu ai i le Komiti le vaega sa faia le suesueina o le Tulafono Tau Faaofi i le galulue vavalalata o le Komisi o Galuega a le Malo ma le Ofisa o le Loia Sili i le faasoaina o loia i totonu o Matagaluega aemaise la o le toe foi mai o tatou alo ma fanau mai fafo. Ma lou faaaloalo lava.

FOFOGA FETALAI: E te fia tali lau Afioga i le Taitaifono?

Afioga TUISA TASI PATEA: Lau Afioga i le Fofoga Fetalai, o lo o i ai lava le fesootaiga mafanafana a Loia o Ministries ma le Ofisa o le Loia Sili, o a foi ni fuafuaga e manaomia, o lo o i ai lava i lalo o le Tulafono Tau Faaofi e ao ona fesiligia le Loia Sili.

Faamaonia le Fuaiupu 8.

FUAIUPU 9: Loia.

Faamaonia.

FUAIUPU 10: Aga tausili, taiala faavae ma le tulafono laititi o amioga pulea.

Faamaonia.

FUAIUPU 11: Tofiga.

Faamaonia.

FUAIUPU 12: Faafaigaluegaina faavaitaimi, fesiitiaga ma feutagaiga ma le Komisi o le Afaigaluega o Galuega a le Malo.

Faamaonia.

FUAIUPU 13: Taiala mo le faafaigaluegaina.

Faamaonia.

FUAIUPU 14: Totogi, alauni ma isi tuutuuga tau galuega.

Faamaonia.

FUAIUPU 15: Fuafuaga autasi ma lipoti faaletausaga.

Faamaonia.

FUAIUPU 16: Vaegatupe ma le sueina faasuetusi.

Faamaonia.

FUAIUPU 17: Tuusaunoaga mai noataga tau le tagata.

Faamaonia.

FUAIUPU 18: Tusi taiala ma tulafono laiti o faatinoga o galuega.

Faamaonia.

FUAIUPU 19: Tulafono Faatonutonu.

Faamaonia.

FUAIUPU 20: Teuteuga o le Tulafono o Galuega a le Malo.

Faamaonia.

FUAIUPU 21: Aiaiga faasaoina ma aiaiga tau soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Ofisa o le Loia Sili 2012.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa e pei ona faaalia i le Pepa Faaopopo o Galuega.

Tulai mai lau Afioga i le Taitaifono o le Komiti.

Afioga TUISA TASI PATEA: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Fuaiupu 1

Ina ia aveese le fuainumera “2012” ma suia i le fuainumera “2013” ina ia faitauina ai le Igoa o le Tulafono e faapea:-

“TULAFONO O LE OFISA O LE LOIA SILI 2013”.

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o le Ofisa o le Loia Sili 2013 faatasi ma le Faasaoga.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2012 – iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti ona avanoa ai loa lea o le auiliiliina o le Tulafono Tau Faaofi lena.

Tulai mai le Taitaifono o le Komiti o le Va i Fafu, Fefaatauaiga ma Tupe Maua.

Tofa SOOALO MENE (Taitaifono Komiti o le Va i Fafu, Fefaatauaiga ma Tupe Maua): Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o Lafoga o Tupe Maua 2012 faatasi ma le Faasaoga.*

Faaluaina e se tasi o sui usufono mo Vaimauga, Tofa Lenatai Victor Faafai Tamapua ma le sui usufono mo Palauli.

Na faamaonia le lafo.

FOFOGA FETALAI: Ou te faasilasila atu ua faamaonia nei e le Fono Aoa le Lipoti a le Komiti o Matau tau le Va i Fafu, Fefaatauaiga ma Tupe Maua i le Tulafono Tau Faaofi o Teuteuga o le Tulafono o Lafoga o Tupe Maua 2012.

O le a sagai atu loa le Fono Aoa i le Iloiloga Auiliili o le Tulafono Tau Faaofi o Teuteuga o le Tulafono o Lafoga o Tupe Maua 2012.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Teuteuga o le Fuaiupu 1.

Faamaonia.

FUAIUPU 3: Teuteuga o le Faamatalaga 2.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Lafoga o Tupe Maua 2012.

FOFOGA FETALAI: O lo o i ai le Faasaoga i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti o Mataupu tau le Va i Fafu, Fefaatauaiga ma Tupe Maua.

Tofa SOOALO MENE: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ina ia aveese le fuainumera “2012” ma suia i le fuainumera “2013” ma faitauina ai le Igoa o le Tulafono e faapea:

TULAFONO TAU FAAOFI O TEUTEUGA O LE TULAFONO O LAFOGA O TUP E MAUA 2013”.

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Lafoga o Tupe Maua 2013 faatasi ma le Faasaoga.

TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2013 – faitauga faalua

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso 26 Mati 2013.

Tulai mai lau Afioga i le Minisita o Galuega, Felauaiga ma Atinae Eseeese.

Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseeese): Lau Afioga i le Fofoga Fealai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Ala Tetele 2013 i lona faitauga faalua ma ou te fia tautala faamalamalama i ai.*

Faaluaina e le Minisita mo Punaoa Faalenatura ma le Siosiomaga.

FOFOGA FETALAI: Ou te tapa lau Afioga i le Minisita e saunoa faamalamalama.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, ua see mai mauga le Fono usu i lenei taeao ma ua siitia le agaga faafetai i le Atua ona ua mafai ona toe faaauau le tatou Fono. O le faamoemoega o lenei Tulafono Tau Faaofi ina ia teuteu ai le Tulafono o Taavale e Feoai i Ala Tetele 1960 na ma toe faamanatu ai soligatulafono i le aveina o taavale a o aafia i le ava malosi po o vailaau faasaina, ina ia faaaogaina ai le suesuega i so o se itu e le o ona e aveia o se isi faiga e tali tutusa ma le faiga e faaaogaina ai masini manava. Ua aveesea ai le aia tatau o se tagata ua maua o lo o ia aveina se taavale a o lo o aafia i le ava malosi, ina ia filifilia i le faia o se suega o le toto ma le faia o le iloa o le aofaiga o se ava malosi i lona toto.

E pei o lenei Tulafono lau Afioga, o le 1960 o se toe vaitau ua umi a o le suiga ua tele masini e mafai ona suesueina ma ua tele foi le suiga o le feoai i

luga o ala tetele ma taavale ua alagatai ai ona fai se teuteuga lau Afioga i le Fofoga Fetalai.

FOFOGA FETALAI: O le avanoa leni e tuuina atu i le Maota pe i ai se sui usufono e fia saunoa. Tulai mai le sui usufono mo Faasaleleaga Nu. 2.

Susuga PAPALII LIO FAAVAIIVAIOMANU TAEU MASIPAU (Faasaleleaga Nu. 2): Faafetai i lau Afioga i le Fofoga Fetalai mo le avanoa, faafetai foi i le Minisita mo leni Tulafono Tau Faaofi. Out e talitonu e tele lava le taua o leni Tulafono Tau Faaofi aemaise o le puipuiga o le au solitulafono i le ava malosi ma isi ituaiga vailaau faasaina ua oo mai i totonu o le atunuu. Malo faafetai mo leni Tulafono Tau Faaofi.

Ona pau lava sa matou fautuaga ou te talitonu o lea ua i le Faalapotopotoga o Felauaiga i luga o le laueleele leni Tulafono Tau Faaofi ma ua aumai i luma o le Maota. O le matou fesoasoani talu ai ona o lo o faatino pea e Leoleo le enforcement le faatinoina o leni Tulafono Tau Faaofi a o lea foi e faatino e le alii ofisa o le Faalapotopotoga o Felauaiga i luga o le laueleele. O le agaga lava ia ua tatai foi ona faasolosolo malie atu ma tuuina atu atoa i le Faalapotopotoga o Felauaiga i Luga o le Laueleele le faatinoina o leni Tulafono Tau Faaofi i luga o le auala. Ou te talitonu o lea ua amata ona masani ma ua lava lo latou tomai, ae oo foi i le faatinoina o nei test e tatai foi ona i ai le Faalapotopotoga o Felauaiga i Luga o le Laueleele. O le agaga autu o se manatu aua o lea ua faasolo ma fesoasoani atu le Matagaluega o Leoleo ma Falepuipui i le faatinoina, ae talitonu lava e i ai foi isi tiute taua o le Matagaluega o Leoleo ma Falepuipui o lo o manaomia aemaise o le faataunuaina o a latou suesuega, mataupu a le mamalu o le atunuu e manaomia ai le mamalu o alii Leoleo latou te faatinoina i le Faamasinoga. Ona e maua ua tele taimi e manaomia ai Leoleo mo mataupu i luma o le Faamasinoga aua o le taunuuga lava lea o galuega faa-Leoleo, e taunuu i luma o le Faamasinoga ina ia saili le amiotonu ma tulaga faapena o mataupu. O le agaga o le talosaga pe le i alagatai ona faatino atoa e le Faalapotopotoga o Felauaiga i Luga o le Laueleele le traffic i luga o le auala e pei o atunuu i fafo, ae faamatu le Matagaluega o Leoleo ma Falepuipui ona e tele ma anoanoai foi a latou galuega ma latou suesuega e moomia foi i luma o le Faamasinoga a latou molimau.

O le tatalo lea ma le agaga faaaloalo i lau Afioga i le Minisita, ma le faaaloalo lava faafetai.

FOFOGA FETALAI: Malie lau Afioga i le Minisita e tasi ai le taimi e tali atu, tulai mai le sui usufono mo Aana Alofi Nu. 4.

Afioga TOEOLLESULUSULU CEDRIC POSE SALESA SCHUSTER (Aana Alofi Nu. 4): Faafetai lava i lau Afioga i le Fofoga Fetalai mo le avanoa, faafetai foi i le Minisita mo le faamalamalamaina o le Tulafono Tau Faaofi.

Ona pau lava le atugaluga lau Afioga i le Fofoga Fetalai, atonu a see atu i le Komiti latou te iloiloaina auiliili leni Tulafono Tau Faaofi o le fautuaga ina ia toe silasila i le vaega lea "o le toe suesueina ma le faamaonia o i latou e i lalo aemaise lava i le vaega lea o drugs. Ona e le o maoti po o le a le ituaiga suesuega lea o le a faaogaina. E tatai ona faamaoti mai i le Tulafono Tau

Faaofi ona o lea foi e pei ona taua e i ai breathalyzer pen a o breathalyzer pe faaoga foi nisi o vaega sa faaogaina i tausaga ua tuanai po o le fua i le vaai a le Leoleo.

Atonu o nei vaega e ao ona auiliili i ai ina ia aua ne i fuaina i le vaai a le Leoleo ae faaoga pea a tatou metotia, e le gata ina faaoga i atunuu i fafo a ua leva foi ona i ai i le faaogaina i le tatou atunuu. Faafetai.

FOFOGA FETALAI: Malie le Minisita se i tulai mai le sui usufono mo Faasaleleaga Nu. 4.

Afioga PESETA VAIFOU TEVAGA (Faasaleleaga Nu. 4): Lau Afioga i le Fofoga Fetalai, talu ai ona o le mataupu lenei e foliga mai i le faatalanoaina i le suesueina atili ina ia maua ai le moni ma le faamaoni o le tulaga lea o le aveina o le taavale e le gata i le ava malosi pe faasuava a o le feagai ai o tagata nei ma drugs.

O le agaga autu lava o lou taofi i le tulaga lenei, ina ia maua ai foi le amiotonu ona e tatau lava ona ave nei lipoti ma nei mea uma e suesue mai fafo. O lo o i ai masini faapitoa mai fafo, ou te talitonu lava au ia e maua mai ai i ina le tali sao o nei mea. Aua a tatou tuu nei i tatou tagata e fai mai e latou le faaiuga, ia o lea lava tatou te vaavaai i ai e oo lava i faaiuga a nuu, a i ai lava le mea e le fiafia ai le isi tagata i le isi tagata, e te i lava ua faamaonia. Ia e pei o le tulaga lea e avatu ai se manatu o lenei itumalo. O mataupu faapenei e fai lava si maaleale e pei o le mea lea o le feagai ma drugs ma le mea lenei o le faasuaava, e tatau lava ona ave i fafo e aumai ai lipoti sao. Ma lou faaloalo lava.

FOFOGA FETALAI: Malo. Malie lava lau Afioga i le Minisita se i tuu atu muamua le avanoa i le falelua lea o Faleata Sasae ma Faleata Sisifo. Tulai muamua mai Faleata matua, Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai lava i lau Afioga i le Fofoga Fetalai mo le avanoa, faafetai foi i lau Afioga i le Minisita mo le Tulafono ma le Matagaluega. O lau vaavaai i lenei Tulafono Tau Faaofi, e ese le taua o lenei Tulafono Tau Faaofi, ma ou te faafetai foi i le Matagaluega, aemaise i latou na saunia lenei Tulafono Tau Faaofi i le sauniga o le Tulafono Tau Faaofi lenei, aemaise lava i le vaega lea o le ava po o le pia ma drugs. E pei ona silafia e le mamalu o le Palemene lenei, tasi lenei faafitauli o lo o ua tulai tele mai i totonu o le tatou atunuu, aemaise i tupulaga. O le mea foi lea e mafua ai ona taofiofi a tatou fale tafafao i le po, ona o le mafuaaga lea o le le mafai ona control pe fuafua le malosi o le inu i le pia po o le ava malosi, aemaise lava i le mea lea ua sau nei o fualaa faasaina. Ma ou te lagolago ma le malosi lenei Tulafono Tau Faaofi. E ui lava ina fai mai le isi vaega o le Tulafono Tau Faaofi lenei o le a aveesea ai le aia tatau a le tagata foi lea pe suesue lona toto pe a fuafua ua le lava e pei ona saunoa le Tulafono Tau Faaofi i mea nei e manava i ai, a o lea e fai mai le Tulafono Tau Faaofi e leai la sou aia tatau ua pule lava e o le a faatinoina lenei Tulafono Tau Faaofi, pe tui lou toto e suesue, po o le a le ituaiga afaina lea e te afaina ai i le vaega lea. A tagai foi i faalavelave tutupu i totonu o le tatou atunuu, tasi lenei mafuaaga tele o lo o tele ai e manunua ma faalavelave i totonu o aiga, so ose ituaiga faalavelave lava i totonu o aiga, e

tuuāia lava le vaega lea o le pia po o le ava i lalo o le influence o le ava. Ma ou te matua faafetai tele i lenei Tulafono Tau Faaofi. A na i ai foi ma se isi Tulafono Tau Faaofi malosi atu i luma e atili ai ona taofi le vaega lea i le faia o lenei vaega le mafaufau vaeatu le faafofogaaga a le atunuu, i le ova lea ma le malosi o le inu. Ae momoli atu lau faafetai i lau Afioga i le Minisita ma le Matagaluega i le Tulafono Tau Faaofi lenei, aua a lelei lava ona puipui le Tulafono Tau Faaofi lenei i le vaega lea, o le a mafai foi ona toe tuutuu atu i tua fale tafafao ma fale fiafia lea e fiafia ai le isi vaega lea o le HRPP, ina ia mafai ai ona lava le tamaoaiga e ao i nai nei tagata pe a fai. Aua e pei ona silafia, o le tasi lea tamaoaiga e vave ai ona lelei pisinisi. Ua ala ona mafua le Tulafono Tau Faaofi lenei, ona o lenei lava mea o le ava. Ua ou tulai atu ai e faaalu atu lau lagolago tele ma le faafetai i lau Afioga i le Minisita ma le Matagaluega ona o lenei Tulafono Tau Faaofi matagofie. Faafetai lava.

FOFOGA FETALAI: Malo faafetai saunoa. Ia tulai maia le sui usufono mo Faleata Sisifo.

Tofa LEALAILEPULE RIMONI AIAFI: E muamua lava ona faafetai i le Afioga i le Minisita mo le Tulafono Tau Faaofi. O le mea maoae lea ua i ai i le tatou Palemene, o le tele o Tulafono Tau Faaofi ua tuuina mai ma pasiaina. O se mea lelei lea. A o le mea e aupito sili ona faanoanoa ai lou sui usufono, o le faamalosiā o nei Tulafono Tau Faaofi e lau mai. O lea ua tatou vaai o lea ua toe aumai le isi Tulafono Tau Faaofi e faaoga ai isi metotia ia ma le sueina o le toto, a o lea ua leva ona i ai le Tulafono lea o le faaoga o mea manava (breathalizer), ae le o lelei ona faaoga lea Tulafono Tau Faaofi e oo mai i le aso. E matagofie tele i lou talitonuga, a na faamalosiā ma toaaga e fai le Tulafono lea i le tele o po ma vaiaso uma, o le fofa lēna o le tele o faafitauli. O le tagata ia e alu fiafia, o lona aia tataua lēna, a o le aia tataua a le Matagaluega le solia o le Tulafono pe a uma ona tafao. A o le mea lea e tupu, o le tele lava o po, e le o faaogaina le malosiā lea o le Matagaluega. O lona uiga la o lau faamatalaga, a na faamalosiā ma lelei faatino le vaega lea o le Tulafono ua leva ona i ai, e le gata ina tuuitia le Tulafono, ae matua nofo uta foi tagata. E i ai le taimi na fai ai i weekend foi nei taitasi i Aso Faraile, na amata foi ona mafaufau tagata a omai e tafafao, e i ai nisi e avatu latou pe faaoga taxi, o lea ua tele le mau taxi. O le uiga la o lau fautuaga, muamua, ia matuai faamalosiā. Ua leva ona i ai Tulafono. O le fautuaga a le Matagaluega ina ia....

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Palemia.

Susuga Ho Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faamalamalamaga a le Minisita i le Kapeneta ma le Komesina o Leoleo, e faigata ona faatino atoatoa le latou galuega pe a leai le teuteuga lea. Ae tutusa lelei lava lou naunau i le faatinoga ma le naunau o leoleo. A tuu loa la i ai ma isi teuteuga ia, ona atoatoa loa lea i ina o le latou faatinoga, ma o le mafuaaga lēna o lea ua aumai ai Tulafono Tau Faaofi i totonu o le Maota. E sao au lau Afioga i le Minisita mo Leoleo?

FOFOGA FETALAI: Faafetai. Ia, se i tulai maia lau Afioga i le Minisita mo Leoleo, Falepuipui ma Auaunaga Tau Tinei Mu.

Afioga Hon Sala Fata Lisati Pinati (Minisita mo Leoleo, Falepuipui ma Auaunaga Tau Tinei Mu): Faafetai lava i lau Afioga i le Palemia. O lenei Tulafono Tau Faaofi, o se Tulafono Tau Faaofi taua foi, ma i se lagona lava i le mea lea o le malutia o tagata, aemaise foi o le a faapea foi ona restricted Tulafono i le saolotoga, i le movement o tagata i faletalimalo aemaise foi la o fale ava. Mo se faataitaiga e pei ona taua e le sui usufono mamalu, e moni lava le saunoaga. A o le itu lea e tilotilo foi i ai, o le Tulafono foi ia o le Tulafono e fai mo tagata e puipui tagata. A tuu loa i le tulaga e tulai mai le malu o le Malo e faatino o latou tiute, ona toe faitio foi lea ua aggressive tele le approach a leoleo e agai tonu i le Tulafono lenei. E pei o le itu lea e i ai, ina ia faatino a ia faapena foi ona malupuipuia tatou, a ia maua foi le saolotoga, le movement. E pei o le itu lea ou te fai atu ai, aua afai nei o lea, ua sili loa ona taatia uma lava taavale a i latou o lo o fia o e tafafao ae faaoga tamai taavale pei ona taua e le sui usufono mamalu. Faafetai.

FOFOGA FETALAI: Malie le sui usufono mo Faleata Sisifo se i toe tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai ou te toe faaopoopo atu, ne i te i ua le maua atoatoa mai e le Afioga i le sui usufono. E pei o le tulaga lena, o le a e faafogafoaga mai o lea e faatino faatamalii le tatou Tulafono, ae faatoa atoatoa le faatamalii ma le alofa pe a pasia uma teuteuga ia.

FOFOGA FETALAI: Malo. Tulai mai le sui usufono mamalu.

Tofa LEALAILEPULE RIMONI AIAFI: Faafetai mo le finagalo o le Minisita, e ese le tamalii o lea Minisita. O le mea foi lea ou te tau alofa ai i ai. O le tamalii ia e tumau, a o le faatinoga e le o faia. A faatino loa faatamalii ona atoatoa loa lea. Faafetai lava ua tele galuega lelei ua faia e lau Afioga i le Minisita. O le mea lea, e tusa lava pe leai ni masini, o le taimi lava na tu ai taavale i Vaitele i po, e uma le lua vaiaso e leai se mea o toe tupu, tusa lava pe na o le tu, leaga o le Samoa e fefe i le leoleo, e faaaloalo foi i ai. A tutu la taavale faapea e tasi i Vaitele, tasi i le taulaga, e lava a lena. A o le mea la lea o le nila lau Afioga, o le mea lea ou te popole ai, leaga e i ai nisi...

FOFOGA FETALAI: Se i tulai mai lava le Minisita e a ia le Tulafono Tau Faaofi masalo e i ai le mea lea e fia saunoa mai ai ma tau mai.

Afioga Hon Manualesagalala Enokati Posala: Lau Afioga i le Fofoga Fetalai, na pau lava le popolega foi lele o le faafogafoaga mai a le au taumafa ava o lea e i ai tagata e lagolagoina latou. A o le agaga i totonu o le Tulafono Tau Faaofi lenei, o le saogalemu ma malupuipuia le atunuu. O lea foi a oo ina tutupu faalavelave ona faapea mai lea po o a galuega o lo o faatino. A o le Tulafono Tau Faaofi lenei, afai e sailiili atu e manava ma ua tatau ona ave e siaki le toto, e galulue faatasi ai le Matagaluega mo Leoleo ma le Matagaluega mo le Soifua Maloloina. Afai foi e avatu i le Matagaluega o le

Soifua Maloloina e moomia le ave i fafo e saina mai ai nisi tulaga, o le tiute lava lena e faatino. O le agaga maualuga o lenei Tulafono Tau Faaofi, se i maua le saogalemu ma malupuipua o tatou tagata o lo o feoi i luga o alatetele, aua e le na o avetaavale ma tagata feoi i taavale o aafia ai le soifua o le tatou atunuu. Na pau lava le mea afai e silasila atu o i ai le tulaga e tatau ona siaki le toto, ia pei o laasaga ia e tatau ona ave e siaki lelei ma fai ai suesuega, ina ia faamaonia, o le tulaga o le faamaonia o le saogalemu. Ma le agaga faaloalo.

FOFOGA FETALAI: Malo. Faaiu maia le saunoaga a le sui usufono mo Faleata Sisifo.

Tofa LEALAILEPULE RIMONI AIAFI: Faafetai lava i lau Afioga. E pei o le tulaga lena, o Tulafono uma lava pei o ea ua tau mai e le Minisita i lau faamatalaga mai le amataga, o Tulafono uma lava nei e aumai i le Palemene, e tasu lava le auga ia filemu ma manuia Samoa. A o le faafoeina la o le Tulafono Tau Faaofi, pei o le mea lea o lea e avatu ai le tuualalo. Aua o le Afioga i le Minisita mo Galuega, Felauaiga ma Atinae Eseeese, e ta loa le 9 tofa, a o matou nei e taamilomilo i le po atoa i Vaitele ma le taulaga, e pei la e vaavaai e security foi nei, e sui usufono i le taeao ae security i le po. O lea la ou te talanoa atu ai i lou experience foi lele faatafao e fesoasoani ia te ia i le mea lea e tupu nei aua e tele lou malamalama i le vaega lea.

FOFOGA FETALAI: Ia, se i tulai mai le Tuiatua, tulai mai le sui usufono mo Aleipata Itupa i Lalo.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, ua manaia lava le faamalamalama a le sui usufono, si au uo lea mai Vaitele, e pei e fia faamalamalama lava e lou sui usufono le saunoaga e galue i le po as a security. Po o lona uiga o aveane le taavale a le Taitai o le Itu Agai e feoi ai e saili mea foi nei o faaletonu o le tatou Malo ma lipoti mai i le Palemene? Ma lou faaloalo.

FOFOGA FETALAI: Malie le sui usufono ona o le taua tele o lau saunoaga, tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala: Lau Afioga i le Fofoga Fetalai, e taua tele le taimi faatulagaina e le sui usufono mamalu. O la e lava e manino le taimi e afa le 9 ua tata ona momoe tamaiti, a o tatou, e leai o tofi na o tatou o Taitai o le atunuu o le vaavaai, e le gata i aiga ma feofeoi ae aua nei i ova atu ma le 11. Ae pei o le sui usufono e ova atu ma le 2 i le 3 tolu o la e lava e feoi ma tutupu ai faalavelave.

FOFOGA FETALAI: Malie le sui usufono mo Faleata Sisifo, faaiu maia le saunoaga. Aua e te popole i le Tulafono lea e le maua oe. Aua e te popole, ae agai ia e faaiu mai le saunoaga.

Tofa LEALAILEPULE RIMONI AIAFI: Faafetai lava. O isi po ou te security, a o le tele o po ou te faaturisi, ou te fesoasoani i tagata foi nei

tafafa ma le aufai bar foi lenei. O le mea la lea i le suega o le toto, aua o lea e maitau e faigata ona detect ma iloa tagata o la e faaaogaina fualaau faasaina, ae faafetai o lea ua i ai le avanoa lea ua ave ai e tui le toto. O le mea la lea ou te fia iloa, pe faapefea ona iloa e leoleo o lea e faaaoga e se tagata avetaavale mea nei o fualaau faasaina, aua o le ava ia e faigofie. Ma le isi la vaega mo le aia tatau, a i ai nisi foi nei i lo matou talitonuga faalelotu, e le mafai ona faaaoga le nila foi lea e tui ai, pe i ai se isi metotia a le Afioga i le Minisita e faaaoga, ae lagolago e le sui usufono lau Tulafono Tau Faaofi. Faafetai lava.

FOFOGA FETALAI: Malo faafetai. Malie lau Afioga i le Minisita, toe tasi lava le finagalo lea ona tuuina atu lea o le avanoa. Tulai mai se tasi o sui usufono mo Vaimauga Sisifo, Tofa Lefau Harry Schuster.

Tofa LEFAU HARRY SCHUSTER: Faafetai tele i lau Afioga i le Fofoga Fetalai mo le avanoa. Lau Afioga i le Minisita mo Galuega, Felauaiga ma Atinae Esee, e lagolagoina e lenei foi sui usufono mo Vaimauga Sisifo le Tulafono Tau Faaofi ma le aoga o le Tulafono Tau Faaofi lea e puipuia ai tagata feoi ma tagata lautele mai e o lo o aafia i le faasuaava po o fualaau, e le tatau ona latou aveina se taavale.

Na o le pau lava si popolega lea e ia te au lau Afioga i le Minisita, o le vaega lea o le Tulafono 3(c) o lea o lo o faapea mai o le faamatalaga ua tuuaia ai le ava malosi po o se vailaau faasaina po o tuuaiga uma e lua i le faafuaiupu 3(a) ma le (d) e ao ona faaleaogaina i luga o se mafuaaga o le le mautinoa po o le toe faaluaina o le faia.

Lau Afioga o le popolega i le vaega lea o le Tulafono Tau Faaofi, e i ai le Tulafono foi lea e saunoa soo i ai le mamalu o le Maota, o le separation of powers. A ou faitau atu i le mea lea, e pei o lea e foliga mai ua faatonu e le Palemene Faamasino a faaletonu le faiga o le moliaga pe faalua le faiga o le moliaga, e le mafai ona faaleaogaina e le Faamasino tulaga ia. A o lo o manino lava i le separation of powers, e le faatonuina e le Faamasinoga le Palemene e le faatonuina foi e le Palemene le Faamasinoga i le faiga o le latou galuega. Ia te au i mea ia e lua, o le le mautinoa ou te popole ai foi ona o le vaega 10 o le Faavae lea e fai mai, “e le tatau ona faamaonia se moliaga e faasaga e le o manino”, e tatau lava ona manino po o le a le mea lea e molia ai oe le Tulafono lea e molia ai oe ona faatoa mafai lea ona faamaonia lea o se moliaga. O lea e manino le Tulafono i ona vaega ia e mafai ona molia oe i le Tulafono pe a na o le ava, po o le ava ma se fualaau faasaina e tasi pe lua pe tolu pe tele atu foi. O le mea lea ou te popole i ai o le tulaga lea o le le manino aua o le faaluaina o lo o i ai a le Tulafono na pasia e le Palemene o lo o ave ai le malosiaga e Faamasino o le tulaga lea a tilotilo atu le faamasino e lua pe tolu fa lima moliaga la e duplicate ona fesili lea o le Faamasino i le leoleo po o le ofisa o le Customs po o fea o moliaga ia e te manao e faaauau ae o fea e te manao e ave i tua ona o lea e tutusa uma mea ia, ia ona fai lea o le filifiliga ae o le mea lea o le le mautinoa, ou te popole la ona e alu tonu lava le mea lea i le faavae o le tatou aia tatau, so o se isi lava o tatou e tatau lava ona mautinoa po o le a le mea lea e alu atu e tali i ai. Ia manino i le Aufaigaluega po o le a tonu lava le mea lea e molia ai le tagata lea ia mafai e le tagata lea ona tali i le mea lea e molia atu ai, tusa pe aumai le galuega a le ofisa e faaletonu ae le mafai ona oo le Faamasinoga ma faaleaogaina le mea,

o le tulaga lea ia te au e fai si ou popole i le tulaga lea e alu agai i le faavae. Faafetai tele mo le avanoa i lau afioga i le Fofoga Fetalai.

FOFOGA FETALAI: Malo faafetai mo le faamaninoga. Malie lau afiog ai le Minisita sei tulai atu le sui mulimuli lea.

Afioga AFUALO WOOD UTI SALELE (Salega): Faafetai i lau afioga i le Fofoga Fetalai mo le avanoa, na ona ou tulai atu lava foi e faamau le agaga faafetai ma le lagolago i le Tulafono Tau Faaofi, ae faaoga ai lenei avanoa e faufautua atu ai aemaise o le Matagaluega mo le Soifua Maloloina ma le Komiti o le Ava Malosi, se i silasila ane aua o lenei Tulafono Tau Faaofi o lo o taumafai tatou e foia lea faafitauli, a o faasalalaua lea e i ai e faatau le ava malosi, commercials, ia o le matua malosi lava o faasalalaua. O lona uiga o le tatou Tulafono Tau Faaofi lenei e tapena atu ina ia faaitiitia ae ona o le saolotoga lava. Ia ma se i silasila ane foi i le faaogaina o le SROS ma le Soifua Maloloina, se i fuaina lelei le malosi o le anti po o le concentration o le alcohol o le tele o fagu malosi se i vaeane lou gutu ma le afi, lea e faatau pe tutusa ma le label o lo o i ai, e moni o lea e tele ina ta tui e 10 e tasi lava le itula e inu le fagumalosi po o isi ava malolosi le anti la e i ai e pei o la na inu i le po atoa, ona tele ai lea o isi faafitauli mo tatou.

E pei o lau fesoasoani atu lea ae manaia le Tulafono Tau Faaofi, faafetai.

FOFOGA FETALAI: Ona o lea ua taua le Matagaluega mo le Soifua Maloloina, o lea ou te tapa ai le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Faafetai mo le galuega taugologolo a sui usufono. O le agaga moni lava lea o lo o tau uunaia le Matagaluega mo le Soifua Maloloina ina ia galulue faatasi Taitai o le atunuu e tauaveina o lea faamoemoe mo le ausia o matatia moomia mo le faaitiitia o faamai le pipisi. O le ava malosi po o le alcohol o lo o i ai i totonu o le vaega e lamatia ai le soifua maloloina e fa, lea e tau ape faapuupuuna o le SNAP, Smoking Nutrition Alcohol for lack of physical activity. O vaega ia o lo o aofia ai ma le alcohol i totonu. O galuega faalauiloa o lo o tauave nei e le Matagaluega o lo o avatu i nuu i tua ma tala atu e taofi le ulaula, taofi le sikareti, taofi le ava malosi, taumafa ma le tatau mea tausami e talafeagai ma le soifua maloloina ma ia toaga e faagaioi le tino. O le faalateleina lea o le anavatau tauave a le Matagaluega mo le Soifua Maloloina e faaitiitia ai risk factors po o le vaega lea e lamatia ai le soifua maloloina.

O le tulaga i le alcohol e pei ona maitauina i le tulaga o taaloga, e o atu le Matagaluega mo le Soifua Maloloina ma a latou faailoilo ma faalauiloa e faatutu solo i totonu o le malae ma faailoa atu i tagata nei tulaga ina ia mafai ai ona teena. O le agaga moni o lo o taumafai ai le Matagaluega o le suia o tu masani po o le tulaga masani lea ua agai i ai le atunuu po o lifestyle change. O taumafaiga ia aua a le suia amioga nei po o tu masani o lo o ua aafia ai le lautele o le atunuu e le mafai ona ausia le matatia o lo o taumafai i ai le soifua maloloina.

FOFOGA FETALAI: Ou te faamalulu atu i lau Afioga i le Minisita mo le Soifua Maloloina o le a faauau le tulaga o le tatou aoaoga faa-soifua maloloina pe a tatou toe taliu mai i le tatou malologa masani.

Na faataatia ese Taulumaga a le Fono Aoa mo lana malologa masani i le itula e 10:30 i le taeao.

Na toe amatalia Taulumaga a le Fono Aoa i le itula e 11:04 i le taeao.

FOFOGA FETALAI: Ona o le aso o le aso puupuu tatou te malolo ai i le itula e 12:00, o lea na suia ai le tatou taimi malolo mo lenei aso. E talitonu ua matagofie foi ona ua leva ona tatou faa-ao gagase i le po anapo, ua tatu ona vave fai se tatou taliga sua lelei ina ia sao i alo ma maua pea lo outou soifua manuia mo le faauauina o tatou galuega i lenei aso. E talitonu ua maua le tatou faamalosi tino e faafoisia ai le malosi aua le faauauina o la tatou galuega.

E faia le malologa o faauau le saunoaga faamalamalama a le Minisita mo le Soifua Maloloina, e pei lava ona silafia e le Maota o nei faamalamalama uma e faatauina tele e le Fofoga Fetalai pe a tulai mai le Afioga i le Minisita, ona o le taua o le tulaga i le tausisia o lo tatou soifua maloloina aemaise ai o le maua fua o nei faamatalaga nei, ua outou silafia o le tulaga faafomai e taugata tele faamaumaga o le aoaoina o le poto ma le tomai faapitoa o le soifua maloloina, e te agai i le Iunivesite i le 90 tausaga, a o lea tatou te maua fua i le atoatoaga o le faamalamalama a le Afioga i le Minisita. O le itu taua lena, ina ne i pea mai lea itu o le Maota o lou tuu avanoa i le Minisita mo le Soifua Maloloina, ae faafofoga faalelei leaga o le toatele o outou e maua i le mai suka, toto maualuga, mai fofoga, aao ma mea faapena. O le a tuu atu ai pea le avanoa i lau Afioga i le Minisita mo le Soifua Maloloina e faauau le faamalamalama.

Afioga Hon Tuitama Talalelei Tuitama: Faafetai i lau Afioga i le Fofoga Fetalai, e talitonu o lea ua palega auau le tautegea i le paia ma le mamalu o le Maota nei ma ua sao i alo foi le faamalosi tino i lenei itu. Faamalo faafetai i lau Afioga ma le mamalu o lou Ofisa ma le aufaigaluega.

Ua ou tulai atu e faauau se faamatalaga e le o toe umi foi, ua toe lua lava nai vaega taua lea e fia agai i ai se faamatalaga ona sa laga tonu lava e sui usufono, o le tulaga o le pasene o mea inu o lo o faaaogaina aemaise o le pia. E pei ona maua i le tulaga o lo o i ai lea vaega o lea ua fai tauvaga a fale gaosi ava po o ai e maualuga le pasene, o le mea sa sau ai a malosi tele lava o le 4% po o le 4.5% a o lea ua oo atu i le 6.9% le maualuga o le ava malosi i totonu o fagupia. O le tulaga lea e moomia e tatou ua le o toe maua se eva lelei, o lea ua amata ona faaigoa fagupia i manu malolosi, ua i ai le fagupia ua tau o le povi masalo toetiiti sau se isi fagupia e tau o le liona po o se mea faapena ina ia alualu pea i luga le malosi. O le tulaga lava ia o le ava malosi o se fagu e eva ma talanoa, fetufaaai ma fiafia ai, a o le tulaga lea u ai i lenei taimi e le umi lava ona i ai se faalapotopotoga e faafiafia ae vaai atu ua fai le misa. O le taimi lenei i le falemai masalo o lo o molimauna e nisi o sui

usufono o lenei Maota e agai atu i ai aemaise o taimi o le afiafi po o le 10 i le 11 e faatumulia i manuaga, a le o ni misa po o le lavea i taavale. O le tulaga lava lea o lo o i ai le fonotaga lea na matou auai atu ai ma le Afioga i le Fofoga Fetalai, Global Conference On Health Promotion o lo o faamalosia ai le tulaga in Health in all policies. O le agaga tonu lea ua aumai e le sui usufono i le taimi nei e tilotilo agai i le Tulafono Tau Faaofi, po o ai lava e ona le Tulafono ae po o fea le Ministry e sau ai le Tulafono, ia silasila i ai i le vaega e aafia ai le soifua maloloina. O le agaga fiafia lea e ia te au i lenei taimi ua ou fiafia ai e tulai atu e faamalosia lea tulaga, ona ua aumai tonu lava e le sui usufono lea sa saunoa i lea tulaga. Ia tilotilo i le Tulafono i le aafiaga o le soifua maloloina e ui ina e le o se Tulafono Tau Faaofi a le Soifua Maloloina a o lo o i ai vaega e aafia ai le soifua maloloina o le tagata. O le taimi nei foi ua ou talitonu ua tatau foi ona tapenapena se Tulafono pe a faapea e talafeagai ina ia faamuta pe taofiofia ai le malolosi e tuuina atu i le ava malosi ina ia aua ne i sili atu i le malosi e eva ai, ma aua ne i avea o se fagu e tauaimisa ai ae avea o se fagu e fiafia ai tagata uma.

Lau Afioga i le Fofoga Fetalai, o nai vaega ia ua ou toe faaopoopo atu i le taua tele o le mataupu na laga e le sui usufono mo le tatou Fonotaga i lenei aso, ia manuia le Fono, manuia le Tulafono Tau Faaofi.

FOFOGA FETALAI: Lau Afioga i le Minisita po o i ai se isi au faaopoopoga a o lea o le a tuuina atu loa le fesili. Tulai mai lau Afioga i le Minisita.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, ou te iloa o lea ua atoa tupe i le fafao, ua faaalua le finagalo o le Minisita mo Leoleo ma Falepuipui, e faapena foi i le Minisita mo le Soifua Maloloina o lea e galulue faatasi mo le Tulafono Tau Faaofi, ae faafetai foi mo fautuaga mo le agai i luma.

Na faamaonia le lafo ma faitauina le Tulafono Tau Faaofi o Teuteuga o le Tulafono o Taavale Feoi i Ala Tetele 2013 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloilo ma toe lipoti mai i le Fono Aoao i se fonotaga o lumanai.

TULAFONO TAU FAAOFI O AUAUNAGA FAA-SOIFUA MALOLOINA A LE ATUNUU 2013 – faitauga faalua

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso 26 Mati 2013.

Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Auaunaga Faa-Soifua Maloloina a le Atunuu 2013 i lona faitauga faalua ma ou te fia tautala faamalamalama i ai.*

Faaluaina e le Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Minisita e saunua faamalamalama i le Tulafono Tau Faaofi.

Afioga Hon TUITAMA TALALELEI TUITAMA: Faafetai i lau Afioga i le Fofoga Fetalai, o le Tulafono Tau Faaofi leni e tusa o lea ua suia ai le Tulafono sa tauave mai ai le Auaunaga Faa-Soifua Maloloina o le 2006. E leai lava ni suiga tetele o i ai, e laiti lava nai vaega o lo o i ai o lea ou te fia faamalamalamaina.

Mo le silafia o le tausaga 2006 na tuu eseeseina ai le Auaunaga Faa-Soifua Maloloina ma le Pulega o le Soifua Maloloina po o le Ministry of Health ma le National Health Services. E mai la i le taimi lea, lea na i ai le Tulafono lea sa tauave mai ai le auaunaga o le Tulafono o Auaunaga Faasoifua Maloloina 2006, ma e oo mai la i le taimi nei e tusa o le transitional period po o se taimi foi lea o le suiga, tusa o le Tulafono lea a o le taimi o la sa nofo vaavaaia ai ia suiga fou ia ma mataitu po o a nisi tulaga moomia mo le toe faaleleia atiliina o le auaunaga ma toe suia. E i ai la le talitonuga ua lava ma totoe le taimi lea mai le 2006 e oo mai i le aso ua mafai ai ona mataitu ma matauina nisi o vaega o le auaunaga e tataua ona suia ia e tataua foi ona toe faaopoopoina, ma o lea la ua i ai le Tulafono leni, o le Auaunaga Faasoifua Maloloina o le Atunuu 2013. O le taimi foi lea tauave mai i le 2006 o le suiga la sa i ai sa tofia ai ia le Komiti Faatonu lea sa tau o le Management Board po o le Board of Management, a o lea la i le tulafono fou ua suia ai le Board of Management i le Board of Directors ma ua avea ai nei o le faamoemoega o le Tulafono leni pe a pasia ona avea ai lea o le Auaunaga Faasoifua Maloloina o se Faalapotopotoga ua tuufaatasia i lalo o le Tulafono. O lea faiga lau Afioga o le a avea o se Faalapotopotoga aloaia ua aunoa ai ma le vaavaaiga a le PSC pei o lea sa tauave mai ai ae o le a avea nei o se SOE, ma ua siitia ai foi la le tulaga o lona accountability i tulaga o le Pulega o le faaogaina o tupe ia ma le faatinoga o le auaunaga, o le trials operations lea po o le transitional face lea sa sau ai i le 2006, ua aoga tele mo le faatupulaia o le silafia ma le iloa o le Matagaluega mo le avea ai ma mafai ai ona pulea i se Pulega e atoatoa ma lelei ma ua talitonuina, ia o le a faapena foi ona sologa lelei ai ia le faatinoga o le auaunaga.

O le tulaga foi o le Pule Sili, i le taimi lea sa fai mea faalogo lava i le tele o taimi i le Board of Management sa sau ai le Pulega, o le taimi nei ia ua siitia ai foi nisi ona malosia o le Pule Sili e avea ai o se...e mafai ai ona ia faia o nisi o faaiuga e talafeagai i se taimi puupuu, ina ia vave ai ona faatino ia ni fuafuaga talafeagai mo le lelei o le auaunaga. Ia ma o le taimi nei la o lea ua ausia ai le Tulafono leni, o le a ausia ai le tulaga lea o le Single Point Accountability, ina ia i ai se isi e agai i ai tuuaiga, faamanuiaga ma tulaga foi faapena.

O le faamoemoega la o le Tulafono leni, ina ia faamautinoa lea o le faamalieina e le Malo o manaoga o le tausiga o le soifua maloloina o Samoa e ala i le atinae tuuina atu ma le faafoeina o auaunaga faale-soifua maloloina ma faalapotopotoga ma itutino ua taua i le faamatalaga o leni Tulafono.

Lau Afioga i le Fofoga Fetalai, ia o sina faamalamalamaga puupuu lea mo le mamalu o le Palemene, ia soifua.

FOFOGA FETALAI: Malo, faafetai saunoa faamalamalama i lau Afioga i le Minisita e ana ia le Tulafono Tau Faaofi. Ma e talitonu ua manino ma malamalama lo tatou Maota i le faatulai mai o le taua o lenei Tulafono Tau Faaofi mai le 2006 ia e matimati ai suiga tetele na tulai mai totonu o le tatou Matagaluega. Malo faafetai i le tapenaina o lenei Tulafono Tau Faaofi aemaise foi o le tulai mai i le Kapeneta ma le tatou faiga faavae. Ia o lea e maitau atu e leai se sui usufono e fia saunoa, ae o le a tuuina atu loa le tatou fesili.

Oi, faapea au ua laaloa le tatou Tulafono Tau Faaofi, ia malie se tasi o sui usufono mo Palota Taitoatasi, Susuga Hon Papaliitele Niko Lee Hang, sei tuu atu muamua le avanoa i le sui usufono mo Aana Alofi Nu.3, ia o lea ua faaaloalo mai le sui usufono mo Aana Alofi Nu.3, ia tulai mai lau Afioga i se tasi o sui usufono mamalu mo Palota Taitoatasi, Susuga Hon Papaliitele Niko Lee Hang.

Susuga Hon PAPALIITELE NIKO LEE HANG (Palota Taitoatasi): Faafetai mo le avanoa, o le vaega 17 lea o le Tulafono Tau Faaofi i lona puipui (4) i le faaupuga lea o le...

Afioga Hon Tuitama Talalelei Tuitama: Lau Afioga i le Fofoga Fetalai, leai na o se fia malamalama, po o lea ua tatou oo i le iloiloga auiliili po o..?

FOFOGA FETALAI: Ia o lea e refer le sui usufono mamalu e fai mai ai lana lauga faalauaitele i le mataupu, aua la le taua le fuaiupu ae fai mai sao lou finagalo leaga o lea e sao le Minisita a e finagalo loa o le a tatou auiliili o le a tatou auiliili, ae tulai mai le sui usufono.

Susuga Hon PAPALIITELE NIKO LEE HANG: Leai o le tulaga foi lele o le moomia o Lipoti Faale-Tausaga ina ia tuuina atu i le...ina ia tapena ma tuuina mai i le Palemene, ona o lau tilotilo i le vaega lea pei e tele le avanoa lea o lo o tuuina e le o faatapulaaina foi lele i se vaitaimi pe ono masina, a o le tulaga lea ou te faitau atu ai i le Tulafono pei e...faapuina faa-Peretania, reasonably practical, ou te le iloa la po o le a le umi o lea tulaga, ma le faaaloalo lava.

FOFOGA FETALAI: Malo faafetai i se tasi o sui usufono mo le Palota Taitoatasi, Susuga Hon Papaliitele Niko Lee Hang, ia tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa, e avatu foi le agaga faafetai i le Afioga i le Minisita ona o le tapenaina o le Tulafono Tau Faaofi ma Teuteuga ua i ai. Pau lava nai faafesili lau Afioga, atonu ua mafai ona faatalanoaina ma maua ai se manatu pe a faaoo atu i le Komiti o le a faapea ona talanoaina.

O le vaega muamua lau Afioga o le tuu aofaiga o i latou o le a i ai i totonu o le Board lea o le National Health Board, e pau le faafesili lau Afioga pe aisea le mea ua lua ai ia Management Expert e faataoto i ai i totonu.

Lona lua lau Afioga po o le vaega lea e taua o Allied Health Practitioners pe lavea ai latou foi ia ua amata ona lesitala o taulasea ia po o nisi foi o i latou pe na o tagata lava ua satisfy e avea ma i latou e faia leni auaunaga mai aoaoga, pe afai e i ai foi se avanoa o i latou ia.

Lau Afioga i le Fofoga Fetalai o le isi vaega e fia oo atu i ai se manatu, o le vaega lea o le position making o le power o le Board, po o i ai se link ma le Minisita, e le gata foi i lea ona o lo o faailoa mai ia vaega e le Minisita e mafai ona po o i ai i so latou leo i totonu o le Pulega? O le fesili foi, po o se faataotoga lea ua i ai a lo tatou Malo e na o le lua terms e mafai ona tuu i se Pule Sili i se Pulega faapei ona faataoto mai i le Tulafono o lo o i ai nei mo le health, ae po o se vaega autu ua ala ai ona faataoto na o le lua terms i le tai tolu tausaga i le term.

Lona tolu lau Afioga i le Fofoga Fetalai, o le vaega foi lea pe i ai foi se mafuaaga ua ala ai ona faataoto mai i totonu o le Tulafono e tataua ona feiloai leni Board, at least faasefulu i le tausaga, pe i ai se mafuaaga ua ala ai ona faamaoti mai, e le i lalo ifo o le sefulu ae mafai ona i luga atu.

Lau Afioga i le Fofoga Fetalai ona ou oo mai lea i le vaega lea o le faaogaina o seleni foi o le a faapea ona mauaina e leni auaunaga, ona e lagona lau Afioga i le Fofoga Fetalai ia e taua lea vaega mo a tatou tupe maua i le faagaioiga o leni auaunaga. Peitai ane lau Afioga i le Fofoga Fetalai, e talitonu le agaga o le tele foi o seleni o lo o faapea ona tuuina e lo tatou Malo e tapena ai leni auaunaga ae po o taoto mai ai foi i i i totonu po o se isi tulafono faavae se seleni e mafai ona maua mai faaola mai e lo tatou Malo e fesoasoani e ala mai e pei ona taua i dividends ma isi o Pulega, atonu e le o mafai ona ou tau atu i le Tulafono Tau Faaofi o lo o i ai i le taimi nei, ae atonu e mafai ona e faailoa i se taimi mulimuli.

A o le vaega mulimuli lau Afioga, i le vaavaai lea pe mafai ona taatia i totonu o le Tulafono Tau Faaofi ia se vaega e mafai ona faailoa ai le auaunaga foi a i latou o taulasea ona lau Afioga i le Fofoga Fetalai, ua maitauina foi ua lesitalaina nisi o taulasea sa tataua foi ona i ai se fuafuaga lea ona e i ai se feteenaiga a i latou ia, ma nisi o auaunaga o lo o faatinoia i le tatou falemai, faafetai lau Afioga.

FOFOGA FETALAI: Malo faafetai. Malie lava le sui usufono mo Vaisigano sei tuu atu le avanoa i le tulai mai o le Afioga i le sui usufono mo Faasaleleaga Nu. 2, ona tuuina atu lea o le avanoa i lau Afioga i le alii fomai. Tulai mai le sui usufono.

Susuga PAPANII LIO FAAVAIVAIOMANU TAEU MASIPAU: Faafetai lava i lau Afioga i le Fofoga Fetalai lea e lagolagoina foi leni Tulafono Tau Faaofi e taua tele i le matou foi faalogologo o lea ua maitau atu, ia o le faatauaina lava o le Tulafono Tau Faaofi o le faaleleia lava o le auaunaga, o lea e maua atu malo faafetai lava, o le mea moni lava e oo foi i lou sui usufono sa tilotilo lava i taimi ia, atonu o lea e mai le 2006 sei oo mai i le taimi leni sa tuufesili lava i Matagaluega ia e lua, a o lea ua malamalama atu, na o sina taimi puupuu a o lea la ua faapitoa mo leni Tulafono Tau Faaofi, malo lava faafetai.

Na o se fautuaga foi lele i a tatou tupe faaalu o mea faapena mo le agai i luma ma tulaga faapena, po o le a se toatele foi o le aufaigaluega ua i i i le auaunaga lautele ae toafia la e i o i le Pulega, ia na o sina ata faapena mo le

agai i luma ma e aoga foi lenei vaega e fesoasoani atu foi i le Afioga i le Minisita, aua e i ai foi nai tamaiti aoga foi ia o le NUS foi ia pei o lea e aoga faa-Tausimai, pei sa maua ea a latou alauni ae ua le toe maua i lenei taimi, leai na ona faailoa atu atonu e aoga foi pei foi lele tatou te taufai lagona uma lava o tatou o taitai o le atunuu, ae leai se mea faapea mai ai, omai tatou te taufai lagona uma lava, ae taua foi le avatu e silasila foi i ai lau Afioga mo le faagasologa o a tatou tupe faaalu, ae faafetai mo le avanoa, faafetai i lau Afioga i le Fofoga Fetalai.

FOFOGA FETALAI: Malo faafetai saunoa i le sui usufono, tulai mai le sui usufono mo Vaisigano Nu.2.

Tofa MOTUOPUAA UIFAGASA AISOLI VAAI (Vaisigano Nu.2): Faafetai i lau Afioga i le Fofoga Fetalai, pei lava o le Tulafono Tau Faaofi lenei e lagolagoina tele e lou nei sui usufono, aua pei lava o le 2006 ea na amata ai ona tuutuu ese le Ministry ma le National Health Services, o lea la ua toe aumai le Tulafono Tau Faaofi lenei, ia ou te lagolagoina tele le Tulafono Tau Faaofi.

Pau lava lau Afioga i le Fofoga Fetalai i lau Afioga i le Minisita mo le Soifua Maloloina, pei o le popolega o lou nei sui usufono o le mea o le conflict of interest i le Board foi lea o le Directors of the Service po o le Board, ona a e silasila i le faa-Peretania i le puipui (f), A person employed or engage by the Service is not eligible for appointment as a director. O le popolega la lau Afioga i le Minisita sei toe tilotilo ane i ai i sou finagalo ma se silasila foi a le Malo, pei e tasi le fomai lea e i ai, a o le tele o fomai ia e tutoatasi tumaoti, ia e moni lava o lea e...ae tele ina employ e le Health Service from time to time e tauaveina isi tiute pe a le lava le aufaigaluega, e atoa lava nai vaiaso ma masina o engage lava e le National Health Services, e faapena la le Un-Register nurse ia ou te le iloa po o ai se isi nurse ia o nurses uma lava lea ou te iloa o lea e faigaluega uma lava i lalo o le Soifua Maloloina e faapena foi le dental practitioner vaeane le Afioga i le sui usufono ma se tasi na o le toatasi lava le fomai o lo o fai foi sana ia pisinisi tumaoti. E pei lava lea o le Scope Services foi lele o le scope o tagata e fili mai ai Directors, pei o atugaluga na o lou nei sui usufono ae manaia le Tulafono Tau Faaofi, faafetai.

FOFOGA FETALAI: Malo, ia tulai mai le sui usufono mamalu mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e puupuu lava le vaega e fia malamalama ai lou nei sui usufono lau Afioga i le Minisita. Ou te taliaina le Tulafono Tau Faaofi, ae na pau lava le mea ou te fia faafesili atu, o le saunoaga a le Minisita lea lava e pei ona saunoa ai nisi o sui usufono i totonu o le Tulafono Tau Faaofi lenei, a sui mai le vaega lea e vaai e le PSC e alu e avea ma SOEs, ona lelei ai lea o le auaunaga. Ou te fia malamalama la i totonu o le Tulafono Tau Faaofi lenei, po o fea o le Tulafono Tau Faaofi lenei o le a lelei ai le auaunaga a le Vaega lenei pe a faapea e sui mai lalo o le PSC. Aua e moni lava na o le sui o faaupuga, a o le faatinoga lava e tasi le Tulafono Tau Faaofi lenei. O vaega uma foi pe a sui i i e avea ma SOEs, pe tele la nisi tupe e ono maua mai ai i lo

le mea o lo o i ai nei. Na pau le mea ou te fia malamalama ai, ona o lea e faafofoga le Pulega a le PSC, leaga o lea e saunoa le vaega lea, o le suiga mai le vaega lea e lelei ai le auunaga a lea foi Matagaluega. Ma le faaaloalo lava.

FOFOGA FETALAI: Malo faafetai. Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai mo le avanoa, faafetai foi i le Minisita mo le Tulafono Tau Faaofi. Ia, e muamua e aoga tele lenei Tulafono Tau Faaofi e toe faatonutonu ma faatulaga sao le tulaga o i ai le Matagaluega talu ona tulai mai o se vaega tumaoti. I le vaega muamua e pei ona taua e nisi o sui usufono i le Komiti Faatonu, o le popolega foi lena i le tulaga o numera na e tulai mai i ina, pe aisea e moomia ai e tailua tagata mai isi vaega, e tataua ona tagai i ai pe ua lava le taitasi ia tamai i le numera o le 7 pe a finagalo i ai. A o le suiga lena e i ai o le tailua o terms o le Director ma sui, o se suiga fou lea e ese le matagofie, e talafeagai foi le lagolagoina e lenei sui usufono. Ia o suiga lelei ia i le agai i luma e faigofie foi ona aumai ni mafauauga fou ma ni suiga fou i le agai i luma i mea tau faatonu.

O le isi vaega lau Afioga, faafetai o lea ua toe atagia le igoa o le Pule Sili i le Matagaluega i le mea sa sau ai o le Director of General Health, ia, o terms ia e global foi lele e iloagofie ai ma faigofie ona maitau. Ae le o mautinoa e lou sui usufono ona o lea e faaluafesasi ma le General Manager, ae sau i le isi taimi ua refer i le Director General, ae sau i le isi taimi ua refer i le General Manager. Po o le a le faasaoga o le mea lea lau Afioga i le Minisita.

O le galuega o lo o fai nei vavalalata ma le private sector i fomai, o se tulaga lelei tele e faasoa i ai galuega, a o le popolega foi o le tau lea e avatu ai, ona o lo o fesiligia foi e i latou o lo o galulue i totonu le tele tele o le tau lea e offer i le vaega mai tua, pe a faatusatusa ia i latou o lo o faia le galuega, po o le a le mafuaaga o lo o faia ai lea vaega i le taimi nei.

O le mea taua lava i lou sui usufono, o le igoa o le Tulafono Tau Faaofi, o le Auunaga Faa-Soifua Maloloina. O le auunaga o le mea taua. O tausaga uma lava ma aso uma, e faamamafa lava e le tele o sui usufono falemai ma le Matagaluega o Aoga. A o lea ua tatou iloa le fofo, ia lava a tatou fomai, e le o taitai ona lava. E ave ai la lau lagolago tele i le aoga faafomai lea e i ai nei, e ui ina i ai nai faafitauli o i ai, ae fautuaina le Malo, toe tagai lelei i le vaega lea, e taua tele. O le mea e fiafia ai lava lou sui usufono i le aoga lea, o le model la e fai ai, e pei e ese mai. E pei o le isi lea vaega e faatosina mai ai le tele o tagata i ai, e faigofie mo tatou fanau i inei. O lea foi ua tatou vaai i nisi ua iu mai, o la e lava e i luga o le level e tataua ona i ai. Ae tataua la ona taumafai pea e galulue faatasi, o le a le tulaga o i ai le structure lea ua i ai ma le tulaga i si tina lea na amataina, e aoga le taumafai e pue mai le ituaiga faatinoga lea ua fai i ai, ina ia taumafai e faaauai ai pea ina ia mafai ona tatou fofoina lenei faafitauli ma offer atu ai foi i nisi atunuu o le lalolagi ma le Pasefika le taua tele o le mea lenei.

Lau Afioga i le Minisita, e le fou i lau Afioga lenei mea, ma o lenei foi mea sa ou lauga muamua ai i le tulaga o le faatulagaina o totogi o alii ma tamaitai fomai. A o lea ua e taua ua i le salary tribunal se faataatiaga o i ai nei. O le fesili; pe na fetuutuunai muamua ma i latou o lo o galulue i fomai ua malilie i ai, ne i te i ua fai e le Board na o latou, ae le i i ai se fetuunaiga foi lele ma se

maliliega faatasi ma le auaunaga faafomai. I lou lava talitonuga, o tagata uma, e mananao lava e tetele o latou totogi, ae e te fiu foi e te manao e sii lou totogi, e le taitai lava ona lava. Ae i ai le mea i lou talitonuga e faigofie ai ona taliagofie e le tagata, le mea foi lelei o le recognition o lau auaunaga, e pei e amanaia ai foi lea.....

FOFOGA FETALAI: Malie le sui usufono o lo o saunoa se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ua ou tulai atu e faamamaavega i le sui usufono. O mea uma lava ia e te sau ai, ua leva lava ona tagofia. E leai lava ma se mea e fou i lalo o le la. Ua uma la ona uia auala uma lava, ma o le tulaga taua e fai fuafua foi i ai, e fai fuafua foi i le malosi o le tatou atunuu. Ia aua ne i galo ia i tatou, e fua i le structure o mea e mafai ma totogi e mafai ona totogi e le tatou atunuu faapea foi ma le tulaga o le vasaga o totogi. A manatua e le sui usufono, o le itu tonu lava lea na mafua ai ona tulai mai le teva tele lava a le Malo i le 1981. O le faatinoina ma le faatulagaga o totogi i le taimi lena, ma o le tulaga tonu lava lena ma le mea na tupu i le taimi lena i le faatulagaga o totogi ma le tuai ona faatino e le PSC, aemaise ua uma ane ua faalua ona sii totogi o fomai, a o lea e faatali le tóatele o le aufaigaluega e le i oo atu i ai. O le ala tonu lena na fai ai le tribunal lea e i ai nei, ina ia aua ne i toe tutupu mai mea na tutupu i le tausaga e 1981, ma ia ua ne i toe fai faapito ni totogi o se vaega o aufaigaluega a le Malo. E i ai le tulaga lea na e oo i ai, e i ai lava le itu e tataua ona silasila totoa i ai, e pei la o fomai, ae le mafai ona aveese ai le faautautaga tataua e fua i le lautele o le service, ma isi foi profession la e tautua i le Malo i a latou foi galuega fai. O le mea lena na ala ai ona tulai mai le teva lea na tulai mai i le 1995, e le mafai ona gauai le Malo i se mea e tulai mai ua foliga faapito ona fai e le Malo.

O le tulaga la lena lau Afioga i le Fofoga Fetalai o lea ou te fautua atu ai ia te outou lena e i le Itu lena, e pei o se mea fiafia foi lele le faoloataua i le mea lea o le fai o le totogi o ai, fai le totogi o ai, fai le totogi o ai. E le o iinei Tuivalea, a oo loa ina fuafua mea faapea, e te matua faaeteete ina ia tilotilo ina ia aua ne i silasila mai isi vaega o le service ua le amanaia i latou. O le mea e aupito sili ona faigata, o le tupu ae o le lagona i nisi vaega o le service, ua le amanaia a ua ave le faamuamua i le isi vaega o le service. I tomai nei faapitoa, e tataua ona matua tuutuu loloto le faatofalaiga i le Kapeneta.

Lau Afioga i le Fofoga Fetalai, o le tulaga lena, leaga e tele mea na tutupu i Faigamalo i aso ua tuanai. Ma o le puipuiga foi lena o lea e faataoto nei e le Faigamalo lena, ia aua ne i toe tupu mai ni mea faapena i le lumanai. Ae a tupu mai foi, e fail, ona o le tulaga lava lea e tataua ona aua ne i vaai mai isi tama fanau, ua afisi isi ae faasavali is.

Lau Afioga i le Fofoga Fetalai, o lau fesoasoani atu lena i le sui usufono ona e fiafia tele le sui usufono lea e talanoa mai nei, e tau ane loa lava i lea, sii le totogi, sii le totogi. E le o iinei Tuivalea na te faia se mea faapena, o lea ua i ai mea na tutupu i le atunuu lena, ma ia matua faautauta i ai, o taimi uma lava e tagofia ai mataupu ia, e tu mai i luma o le Kapeneta mea ia na tutupu i le 1981.

FOFOGA FETALAI: Malo faafetai. A o le i tuuina atu le avanoa i le sui usufono mamalu, e faamanatu atu lava i taualumaga o tatou felafolafoaiga, o le ala lea sa tau tata ai i le moa o le ala, ona o le Tulafono Tau Faaofi, e le o se Tulafono fou. Ua uma ona lauiliuina mea ia na afea i a outou saunoaga, ae malie e agai tonu a tatou saunoaga i le suiga lea ua tulai mai ai le tatou Teuteuga. Ma lou faaaloalo.

Tofa LEALAILEPULE RIMONI AIAFI: Leai o le mea e fia faasao lau Afioga, ou te le iloa lava e au po o le a lea mea o le faaoloataua. A o lea ou te lauga sao i le lauga faalauaitele i le Tulafono Tau Faaofi. E le o ni mea fou. A lea na ou fai atu, e te fiu e sii le totogi, e le malie le totogi, ae i ai auala e faatino ai. E leai o le mea lena o lea e fia faamalamalama.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai la, e le o se faaoloataua le mea a oe lea na fai nei, o lena e te saunoa mai lava oe i lou manatu, a o lea ua e oo tonu lava i le mea, a le lelei ona tagofia, ona tupu ai loa lea o le fefulituaai, leaga e leai lava se isi o le service e le manao e matua sii i luga lona totogi, ae leai lava foi se isi o le service e manatu ua lava lona sii. O mea na ia manatua, e leai lava se isi e sii atu ae faapea ua lava, e mananao lava ia taufai sii uma i luga. Ae o lo o i i la i le Kapeneta le malosi lena ina ia vaai ia aua ne i tulai mai le tulaga lea na tulai mai i le tausaga e 1981, le teva tele lava a le Malo e tolu masina o teva. Ma o lea foi la e tapa ai e le Malo le tribunal na set up, na faatuina faapitoa lava latou te vaai i vaega ia aua ne i vaai pumoomoo, a ia vaai i se vaaiga lautele. O le mea la lena na ona ou faamanatu atu i lau Afioga, ua leva ona tagofia mea na, lea na ou tulai atu ai. Ua ou alofa atu lava i lou naunau ma le fia umi o lau talanoaga, ae leai lava ma se mea o totoe ua uma ona tagofia e le Kapeneta mea na.

FOFOGA FETALAI: Malo. O lea ua faafofoga lau Afioga i le sui usufono mamalu, e le o se faaoloataua, o le faaumataua. E faaumataua ae avetau o le taua le isi ou uso.

Tofa LEALAILEPULE RIMONI AIAFI: Ou te le iloa faaumataua, ae ou te iloa tau. A oo loa ina ou tau e le toe faauma e se isi. E leai, lau Afioga i le Minisita, e sili atu lou silafia i lo au, ua leva ona e Minisita, ua leva foi ona e i ai. Ia o le a tuu atu i ou tauau o lena e te silafia le mea e tataua ona fai, o lena foi e te i le Kapeneta. Ae le o se mea fou, o la e sao le Afioga i le Palemia. O le 1992, matou faia ma le tamaloa papalagi le structure muamua lava a le falemai. O matou fautuaga na ave i ai, aveese fofamai e o e fai latou galuega, ae sui i ni tagata e o atu e pule lautele. O lea ua i ai nei, o lea ua achieve, o lea avatu tagata lelei i le manage ina o tupe ma run le falemai. A o si ona pona la, o lea e le lelei le faiga o le isi vaega o le bargain na i ai, ina ia fesoasoani la i mea ia ou te talanoa atu ai. E pei ona ou fai atu, e i ai lava le mea e fai ai le auala, e le o le siiga o le totogi, se o le fiafia o le loto. O le tagata Samoa o le fiafia lava o le loto ma le malie o le loto le mea taua lena.

Ona ou oo mai ai lea lau Afioga i pili, leaga o lea e sau i le Tulafono Tau Faaofi le aoina o pili. Muamua, o pili nei e ao i le falemai, ta te le iloa pe fia, aua o isi taimi ta te alu atu ai e mai, e le aumaia lava se pili. A o le tulaga la e i ai i le falemai, e le gata ina lelei meaai, lelei le vaaiga, ua lelei foi ua mama.

Ae pau lava le mea, pe le tatau lava ona i ai se pili talafeagai, aua e tatau lava ona tilotilo lau Matagaluega i le provide ina o mea ia o solo taele, o ieafu, o tagaaluga, o aluga ma mea faapena. Ae i ai se aiaiga foi lea a faapea e le iloa e tatau ona totogi e le mai. Se tulaga faapena e fesoasoani, aua e le natia o lo o taugofie le totogiina o le falemai, a ua siisii i luga le tulaga. O le mea la e i ai, e uma ifo, ua matua lapoa le tausimai a ua pae le mai. Aua e tele lava ina tausami e le tausimai le meaai, ae tau le ai le mai. O mea la ua fia malosi le mai, ae ua matua musu lava le mai e tea i tua le mai. A o mea la ia e tatau ona tagai i ai lau Afioga i le Minisita, o le aoina o pili ma mea nei ina ia fesoasoani i lau galuega. Aua ou te iloa o le tele o lou taimi e te fiafia e tusitusi, ua ou vaai atu ua laitiiti le Tusi Paia lapoa i au tali na ua sauni mai. E leai faapuupuu mai, faapuupuu mai lau Afioga ae o nai manatu ai e fesoasoani ai i lau Matagaluega aua o lena e nofo fale ia Satuiamaa e lava lou silafia i lo se isi o matou ua leva ona e galuega i o e moni e muamua laitiiti lava le sui usufono mo Vaisigano Nu.2 ia te oe ae leaga o lena e te manuia.

FOFOGA FETALAI: O le a tuu atu le avanoa mulimuli lea i le sui usufono mo Falelatai ma Samatau.

Tulai mai lau Afioga i le sui usufono.

Afioga TAEFU LEMI: Malo faafetai i lau Afioga i le Fofoga Fetalai, e tolu lava nai mafuaaga ou te lagolagoina ai le Tulafono Tau Faaofi. E ese mai i lou alofa i le Afioga i le Minisita e ona le Tulafono Tau Faaofi.

Muamua, o lea ua saunoa nisi o sui usufono. O le a faamalositia ai i le Structure lea e operate ai le tatou falemai, le Management Structure ma fai ni nai internal controls e foia ai isi issues ia na talanoa i ai nisi o sui usufono mamalu i le faatinoga o galuega a fomai.

Lona lua, o susuga i alii fomai ma e tausii soifua. Faafetai tele lava i le faiga lea e fai nei e le lava tatou fomai ona faaoga atu lea o le Private Sector e faalava ai lea auaunaga. Manaia tele le faiga lea. Pau lava le mea lau Afioga i le Minisita sa ou taua le mea lea e i ai nei aua e i ai pea aso e umi ai ona faasolo le laina a gasegase pei foi o le Aso Toonai lea na ou taua. Ae o au ia ou te poto lava e fai pe a ou sau o tumu le falemai i Motootua. A ou alu atu loa o tumu le falemai i Motootua ona ou alu loa lea i Leulumoega. O le Leulumoega o le teine fomai pasi ua matua pasia aloaia la e i ai. E tuu mai lana mea faalogo i le tamaititi mai aumai loa ma le vai a le mai, e oo le mai lea i le aiga, taele ma inu ana vai maua le malosi atoatoa. O le talosaga i le Afioga i le Minisita silasila i le faaogaina o tamaitai tausii mai. E i ai le talitonuga 50% o gasegase ia e agai atu i le falemai, e le manaomia ai le tomai loloto aoina o le alii ma le tamaitai fomai lea ua pasi mai le Iunivesite. Ae o le auaunaga faatausi mai e foia ai le faafitauli lea.

Tolu, o le mataupu lea na ou taua lau Afioga i le Fofoga Fetalai, e talatala atu i tua le auaunaga lea, lea ua amata ona fai lava le Health Centre i nai nuu i tua pei foi o si o matou nuu. Faafetai tele atu i lau Afioga a le Minisita, ae o le tatalo lena a faasoaso atu pe tasi le aso ao le isi vaega tele o le vaiaso e tautua ai le itumalo ma nuu i tua ia faaoga nai tausii soifua ua lava le silafia ma le iloa e faatino ai le galuega. O nai motugaafa ia e lagolagoina ai lau Tulafono Tau Faaofi lau Afioga i le alii fomai vaeane lau Afioga i le Minisita.

FOFOGA FETALAI: O le a avatu pea ia le avanoa i lau Afioga i le sui usufono mamalu mo Faasaleleaga Nu.4.

Tulai mai le sui usufono e saunoa.

Afioga PESETA VAIFOU TEVAGA: Faafetai lava mo le avanoa. Lau Afioga i le Fofoga Fetalai talu ai o le mataupu lava lea e masani lava ona ou lauga foi i le Minisita mo le Soifua Maloloina ona o lea ua ou vaai atu ua talanoa mai ai le sui usufono mamalu o le la itu e uiga i solo ma ieafu aemaise lava o le vaega lea e fananau ai nai tina ona o le tulaga lenei, pei o i lava lea o lo o mafua ai foi le tele o faalavelave ia e tulai mai. Sa ou fesili i se tasi o fomai, ao le tulaga lea ua aumai o le tele o ogaumu ia e tao ai ieafu ma solo ua le o toe lelei sei tulou lava lou gutu ma le afi, lea e tao ai solo ma mea faapena ina ia mafai ona tape ai le siama. Na ona faufautua atu i le Afioga i le Minisita talosia ia fai ae le tatou falemai fou lea ua faaleleia lea auunaga. E faapea foi la i le tulaga lea o meataumafa, a silasila foi lau Afioga i le Fofoga Fetalai i le tulaga lea e aliali mai pea i le Matagaluega o le Soifua Maloloina, e lagona lava le faanoanoa. A silasila nei ae pasi mai mea taumafa a le mamalu o le atunuu po o latou ia e i totonu o le falemai, o le ipu mafolafola ae ua mix faatasi mai le kaleve, laupele, o le araisa ma le vaemoa. Ia sei silasila foi i nai tatou tagata, e vaai loa i le tulaga lea ua tei lava ua le fia ai ma toe oso ai ma le mai. Na ona fautua atu i lau Afioga i le Minisita e manaia lava ae saili mai nai tray fai potu e tuueseese ai meaaai ina ia faapea ona manogi i le taumafa a i latou o lo o gasegase i le falemai. Ma le faaaloalo lava.

FOFOGA FETALAI: Tulai maia lau Afioga i le Minisita mo le Soifua Maloloina ou te manatu ua saausi le finagalo o le sui usufono.

Afioga Hon TUITAMA TALALELEI TUITAMA: Ua ou tau le fia tu foi matuai tele naunau nei fesili.

Lau Afioga i le Fofoga Fetalai e lagona le agaga faafetai ona o le amanaia tele o lenei Tulafono Tau Faaofi ma e lagona foi le agaga fiafia e faamalamalama atu ona e foliga mai le tulaga lea o lo o i ai nei le soifua maloloina e ui lava o lea e pepesi i aso uma ao lea e atagia i leanoanoai o fesili i le aso, le tele o le le malamalama o le tatou atunuu i le faagaoioiga o le soifua maloloina. Atonu tasi foi lea auala o fuafuaga a le Matagaluega o le Soifua Maloloina mo le agai i luma ona o le le lava o le silafia e nisi o le tatou atunuu o ana taumafaiga.

O le Afioga i se tasi o sui usufono mo Palota Taitoatasi, Susuga Hon Papaliitele Niko Lee Hang, po o le a le uiga o le reasonably practicable. I le faa Samoa lea e aumai i i lea sa faaliliu e i latou ua malamalama i uiga o upu faa Peretania ma le latou fetuunaiga ia talafeagai ma le uiga loloto o le Gagana Samoa, o lo o faapea mai i “se taimi vave talafeagai e mafai ai ona faatino i le maea ai o le faaiuga o tausaga faaletupe taitasi.” O lona uiga o lau faavasegaga i ai i le faa Samoa o lea e i totonu o le piliota o le tausaga aua o lea e aumai i le maea ai o le faaiuga o tausaga faaletupe taitasi. O lona uiga o le taimi o le tausaga e tuli atu ai le isi tausaga faaletupe. A faapea la o se taimi vave, o le fuafuaga lona e tofua tatou ma le faamatalaga o le upu lea o le vave aua o le vave a le isi o taeao, o le vave a le isi o le vaiaso lea, o le vave a

le isi o le ono masina. O lau fua atu i ai o se taimi faapena po o le ono masina aua o le afa tonu lea o le tausaga lea e faamoemoe e tatau ai ona oo mai.

FOFOGA FETALAI: Malie lau Afioga i le Minisita mo le Soifua Maloloina sei tuu atu le avanoa i le sui usufono e ona le fesili.

Susuga Hon Papaliitele Niko Lee Hang: Faafetai mo le avanoa lau Afioga i le Fofoga Fetalai. E le fia faalavelave foi i le faamalamalamaga a le Afioga i le Minista ae o le tulaga tonu lava na ou fesiligia ai le faaupuga lea ona o la e i lalo o isi faalapotopotoga e tatau ona ono masina le taimi faatapulaa. O le popolega i le tulaga lea ona nei ova ma le ono masina ona tuai ai lea ona aumai lipoti e pei ona faatulagaina i lalo o le tatou Tulafono o le Public Bodies Act. O le uiga tonu lava lea lau Afioga na ala ai ona tuliloa ona e tele lava le avanoa i le faaupuga lea e faifaiaga ai Faalapotopotoga ma Matagaluega e tuuina mai lipoti ma ou te talitonu au ia a uma loa le tausaga faaletupe e tatau lava ona maea le tapenaga i le ono masina. O le tulaga lea ma le faaaloalo tele.

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai e le faaletonu lava le taimi lea na ou tau atua o le ono masina. O le taimi vave lenei faale tulafono, ou te lagona o le a faapena foi ona mulimulitai i ai lenei foi Tulafono.

Ona ou oo mai lea lau Afioga i le Fofoga Fetalai i le faafesili a le sui usufono mamalu mo Aana Alofi Nu.3, sa fesiligia ai pe aisea ua leai ai se sui o le Allied Health. Mo le silafia o lo o taoto i le Palemene nei le Tulafono Tau Faaofi o le Allied Health. E le mafai la ona aofia ai i totonu o le Tulafono Tau Faaofi lenei ona e lei pasia lana Tulafono Tau Faaofi. Ao sui o lo o i ai i totonu o le Board, o sui ua pasia latou Tulafono ma o lo o faagaioi ai nei latou auunaga. Pei o le Pharmacy, o le Dental faapena foi sui o le Matagaluega o le Soifua Maloloina. O le tulaga lea lau Afioga ua ala ai ona leai se sui o le vaega lea.

Afioga Toeolesulusulu Cedric Pose Salesa Schuster: Lau Afioga i le Fofoga Fetalai.....

FOFOGA FETALAI: E manatu e tuu pea sei saausi le faamalamalamaga a le Afioga i le Minisita.

Tulai mai le sui usufono mamalu mo Aana Alofi Nu.3.

Afioga Toeolesulusulu Cedric Pose Salesa Schuster: Faafetai i lau Afioga i le Fofoga Fetalai na ona toe faamanatu atu i le Afioga i le Minisita o lea e i ai i totonu o le Board le Allied Health Profession. O le ala lenei o le faafesili atu po o le Allied Health lea e refer i tagata taulasea ao lea e i ai i totonu o le (e) e tasi le sui o le Health Professional lea e i totonu o le Komiti Faafoe. O le fesaosoani atu lea lau Afioga i le Fofoga Fetalai.

Afioga Hon TUITAMA TALALELEI TUITAMA: Emafai e le sui usufono ona silasila ane i tua i le Schedule o lo o i ai le List of Health Services, Institutions and Bodies for which the Service is Responsible ma o lo o i ai ma Taulasea. O Taulasea la o lo o i totonu o le Allied Health ma o iina la e represent pe afai o lena e agai tonu i taulasea o le sui lena o taulasea o le sui o le Allied Health. Conflict of interest sa faaalua ona o le tulaga faapea o teine fomaina lea e i ai i totonu po o le a le mea ua leai ai ni fomaina foi ia. Mo le silafia o Nurses e i totonu mo NGOs ma Nurses o lo o galulue i le NUS. O lea la o le tulaga i le tamatai fomaina lea e faapea o lea e galue i totonu o le...e le o faafaigaluegaina e le NUS. O fomaina ia e le o mafai ona tofia e pei o GPs, e 38 GPs ia e faigaluega nei i le OUM ma e silafia foi le OUM o lo o i lalo o le Pulega a le Falemai. O le tulaga lena e le mafai ai ona faafaigaluegaina i latou i tulaga ia. O le isi foi vaega e le gata ia i latou ia e taamilo i tua e faigaluega i nuu i tua pei ona faatinoina le galuega lea i falemai i tua ma le Outpatient ae faapena foi ona faigaluega nisi o i latou i lalo o le Pulega a le OUM.

O le interim term for directors lea sa saunoa i ai le sui usufono, o se tulaga lelei lea pei ona saunoa i ai le sui usufono mo Faleata Sisifo o se tulaga lelei lea e puupuu ai taimi ina ia tele ni suiga i totonu o se piliota se tasi tele ai foi ma mafaua lelei e feuisai ai aua e le tuua ai le toe tofia pe a faapea o lo o lelei lana performance. O lo o aumai ai foi ma le mutaaga o le auai ina ia more accountable le lua terms a uma le lua terms ona faamuta lea o lo o i ai foi isi e agavaa e mafai e faatinoina le galuega lea. Ao se tulaga lelei lea ua manatu le Matagaluega e sili ona lelei mo le faafaeina o le tulaga lea.

O le faafesili a le Afioga i le sui usufono mo Faasalelega Nu.2 i tamaiti aoga lea e faapea pe aisea le mea....mo le silafia e le Afioga i le sui usufono e oo mai i le taimi nei o alauni o teine fomaina o lo o aoga i le NUS faapena foi ma o latou pili faapena foi ma tamaiti ia e aoga i le OUM, o la e totogi uma e le Malo. O la lava e faaauau e oo mai lava i le taimi nei. O le tali atu lea i le faafesili a Afioga i sui usufono mamalu.

O le suiga mai lalo o le PSC i le SOE lea sa taua, e leai se manatu faapena e faaleagaina se auunaga o lo o faia e le PSC, a o le tulaga lava lea o lo o i ai le vaiata lena ma le agai i le lumanai, o lea ua tele lava ina tutoatasi Matagaluega mai le PSC. O le uiga la o lau faamatalaga, e i ai tulaga i le faatinoga o le auunaga ma galuega ma matafaioi e vave ona faatino pe a faapea e faia lava i totonu o le auunaga e aunoa ma le faatalia o auala talafeagai ma auala ua uma ona faataotooto e ui i ai le faatinoga o ia vaega i lalo o le Pulega a le PSC. Ae leai se agaga e faapea ua lelei ona ua i ai se mea e faaletonu ai le PSC. E faamalulu atu i le vaega lea, e le o le agaga tonu lena o le taofi lea.

E manaia le saunoaga a le Afioga i le sui usufono mo Faleata Sisifo, o lea e taua, ma o lea foi sa faapoopoina e le Afioga i le sui usufono mo Faasaleleaga Nu.4, o le tulaga lea i mea tau iefu, o solo. Mo le silafia, na lauga le sui usufono mo Faasaleleaga Nu.4 i le tausaga talu ai. E pei lava ona ou faailoa atu, e amanaia tele saunoaga ma fautuaga lelei i totonu o le Maota lena, na saunoa ai i le vaega lea. Ma o le tulaga foi lea na amanaia ma faamallosia atili ai le taumafaiga a le falemai sa i ai i lena taimi ina ia faatino le galuega lea. Ma o le taimi nei la, o lea ua tapena mea ia mo le tatalaga o le tatou falemai fou i le masina o lumanai, toe lua nei vaiaso ona faatino lea. E

le toe faatagaina ai se faaaogaina o ni ieafu po o ni tagaaluga po o tulaga faapea mai aiga i tua.

O le isi vaega na ala ai ona faamalosia le tatou auaunaga e faatino le galuega lea, ona ua maitauina le faamai po o le siama lea sa pisa ai o le Sarpocetes Diseases_Resistent_E pei ona maua i suesuega, o le siama e aumai mai tua, e le o maua i totonu o le falemai. Ae a aafia ai loa se mai i totonu o le falemai, e vave ona pipisi faasoloatoa i totonu o le falemai, ae matuia ona e resistant i mea pe faigata ona togafitia i vailaau faaonaponei, antibiotics, lea la na fai ai loa le faaiuga i lenei taimi, o le a tatau loa ona fai le fuafuaga lea, ina ia aua ne i toe aumaia ni ieafu mai tua. E le gata i lea, afai e aafia ieafu nei ma solo ma tagaaluga e pisia i ni mai i totonu o le falemai, a oo la i le taimi e tea ai le mai, ona tea atu lea ma avatu ai ma le siama lea i tua i e o lo o faamuli mai aiga ona pipisi ai lea i totonu o aiga, faasolo atu ai lea e aafia ai ma isi tagata o le nuu. E le lelei la le vaega lea na ala ai ona ae ai se tofa.....

FOFOGA FETALAI: Ou te vaelupeina le saunoaga a lau Afioga i le Minisita, ou te momoli atu vaimalu i puega. Ou te manatu o lea lava ua talatala ma le la lou finagalo. E pei lava ona ou fai atu i le taimi muamua, e le faataga tago le Palemene pe a talanoa mea tau soifua maloloina, ona o le taua o le soifua manuia o lo tatou atunuu. Peitai, ona o lea ua tatou taunuu tonu lava i le tatou taimi malolo faatulagaina, o lea ou te faamalulu atu ai, o le a toe faaauau le saunoaga ma faaiuina ma tuuina atu le fesili pe a tatou taunuu i le tatou Aso Fono e sosoo ai.

Ia, e avea lenei avanoa e momoli atu ai le faafetai tele i le tatou Maota i lenei vaega o le aso. Ou te talitonu o lea ua tatou tini tauao i le taunuuga o le tatou galuega. E momoli atu le agaga faafetai tele, mai lava i le taeao seia oo mai i lenei itula, ia viia pea le Atua ona ua tatou taunuu ma le manuia i le faaiuga o le tatou galuega i lenei aso. Ua i ai le faamoemoe o nisi o galuega o totoe ma nisi o Tulafono Tau Faaofi o totoe e pei ona ou taumafai atu i le taeao analeila, o le a tatou talatalanoa i ai pe a oo mai i le Aso Gafua. O a foi fuafuaga ma lavisiga ma le faamoemoe mo le taunuu mai i le faaiuga o le vaiaso, ia manuteleina lo outou alofaiva, ia maua lo outou soifua laulelei aemaise foi le feagai ai ma nisi o fuafuaga faale-aiga faale-itumalo ma faale-Malo, ia, alofagia e le Atua ia ulimasao ma ia aua ne i i ai se mala e afe.

E tuuina atu foi lenei aso mo le tapuaiga a si o tatou atunuu, faafetai atu Samoa le tui mai pea o le mulipapaga ma tatalo mai aua le alofaiva o lou Palemene. E momoli atu le agaga faafetai i le paia o le auaunaga i Ofisa Sili o Pulega ma Pule Sili o Matagaluega ma Faalapotopotoga a le Malo i ona tupu ma ona ee, o faleupolu o tofiga, faletua ma tausii, saoa ma tamaitai, malo lo outou galulue. E i ai le faamoemoe o le a tatou toe faatasi iinei i le vaiaso fou, a ia manuteleina faamoemoega ma fuafuaga mo le faaiuga o le vaiaso.

A o le i faaiuina le tatou Fono, ou te tuuina atu le avanoa lenei i le sui usufono mo Alataua Sisifo e fai mai se tatalo faaiu e fauma ai le tatou Fono.

Tatalo.

Na motusia Felafolafoaiga ina ua tolopo Tualumaga a le Fono Aoa i le itula e 12:03 i le aoauli seia aulia le itula e 9:00 i le taeao o le Aso Gafua, 24 Iuni 2013.